

四庫全書薈要

• 乾隆御覽本

史部

十國春秋卷七十六

檢討吳任臣撰

楚十

列傳

符彥通

符彥通潯州蠻帥也恭孝王率羣蠻破長沙府庫累世之積皆為彥通所得彥通由是富强稱王於谿峒間及劉言攻邊鎬欲召彥通為援周行逢曰蠻貪而無義前

年從馬希萼入潭州焚掠無遺今兵以義舉往無不克
惡用彼為哉言乃止復命劉瑀為鎮遏使以備彥通侵
逼之患瑀故土團都指揮使羣蠻所素憚也明年王逵
得湖南欲遣使撫之募能往者帳下牙將王虔朗請奉
檄以行比至澁州彥通盛侍衛見之禮貌甚倨虔朗厲
聲責之曰足下自稱符秦苗裔宜知禮義有異於羣蠻
昔馬氏在湖南足下祖父皆北面事之今王公盡得馬
氏地足下不早往乞盟致使者先來又不接以禮異日

得無悔乎彥通慙思起執虔朗手謝之虔朗知其可動
因說曰谿峒之地隋唐皆為州縣著在圖籍今足下上
無天子之詔下無使府之命晏然自王於山谷之間不
過蠻方一部長耳曷若去王號自歸于王公王公必上
奏天子授足下節鎮與中國侯伯等列豈不尊榮哉彥
通大喜即日除王號因虔朗獻銅鼓數枚于達達曰虔
朗一言勝數萬兵真國士也承制以彥通為黔中節度
使顯德時周行逢命鍾志存為澧州刺史及行逢死志

存奔武陽潯州蠻楊正巖遂以十洞稱徽誠二州或言
即彥通諸部云

何敬真

孫朗

張儼

張文表

何敬真

敬一作景

武陵人也事恭孝王為朗州步軍指揮使

長沙之役列陳于楊柳橋進擊韓禮軍有功王既陷長
沙遷朗州牙內都指揮使將兵戍武陵已而與王逵等
共迎劉言于辰州言帳下指揮使凡十人為親校敬真
蓋其一也未幾從逵克潭州逵自稱武平節度副使權

知軍府事而署敬真行軍司馬逐唐將邊鎬斬首五百級復有功除靜江節度副使居頃之言命敬真為南面行營招討使與先鋒朱全瑋合潭兵以拒南漢二人至長沙達出郊迎相見甚歡日飲酒高會餌以伎女敬真未知達之誘已輒留連不去而先發朗州將李仲遷率兵三千人趣嶺北都頭符會等心怨敬真遂劫仲遷以歸達于是乘敬真醉詐為言使者械繫之獄中隨斬焉時周廣順三年二月辛亥也久之全瑋亦殺死達即以

其事告言言不得已誅會等數人以為解先是達入長沙敬真與全琬各置牙兵與達分堂視事每遇宴集使酒紛拏無復上下之分達心銜之會周行逢張文表事達多盡禮達益與敬真不相協敬真辭歸朗州又不能事言言頗疑達使敬真伺已將討達行逢因說達早圖敬真等為便達曰共除凶黨同治潭朗夫復何憂也由是除敬真意遂決論者謂敬真之禍實萌于行逢一言云

孫朗者初與曹進從家城鎮將咸師朗降南唐南唐以
其兵為奉節都授朗進奉節指揮使未幾隨邊鎬取湖
南行營料糧使王紹顏多減士卒糧賜朗進怒曰昔吾
從咸公降唐唐待我豈如今日湖南將士之厚哉今有
功不增祿反減之不如殺紹顏與鎬據楚地以抗中原
富貴可圖也于是廣順二年正月朗等帥其徒作亂攻
長沙府門不克來奔朗州歸王逵逵問朗曰昔吾從武
穆王與淮南戰屢捷淮南兵易與耳今欲以武陵之衆

恢復湖南可乎朗曰頃居金陵備觀唐政朝無賢臣軍
鮮良將忠佞罔別賞罰不分得保一隅幸矣何暇兼人
朗請為公前驅取楚地如拾芥也達大悅厚加禮遇是
冬十月濟師潭州即以朗進為先鋒使鎬果遁去

張徹不知何地人起家諸軍指揮使與王逵等共立恭
孝王從子光惠于朗州同叅軍府事已而劉言署指揮
使十人號親軍徹居其一焉稍遷武平節度副使王逵
之殺何敬真朱全琇也尤忌徹威勇周行逢因乘間白

達曰敬真故倣姻戚臨行時輒以後事屬倣蜂蠆有毒未可忽也公宜備之達于廣順三年四月庚申遂召倣醉飲而殺之

張文表朗州人與周行逢潘叔嗣同隸劉言戲下累官衡州刺史行逢且死遺言文表即叛討之者必揚師璠也文表聞行逢塲果怒曰我與行逢俱起微賤立功名今日安能北面事小兒乎會周保權遣兵代永州戍文表遂驅之以襲潭州知留後廖簡見文表不為備謂軍

吏曰黃口子至而禽之何憂為伐鼓飲酒如初文表徑入府中簡被殺坐間遇害者凡十數人遂據長沙又將取朗陵保權時年方幼聞叛嘆曰先君誠知人矣僕雖懦安可使軍國落賊手遽命璠帥萬人討之將發保權揮涕對三軍曰先令公墳土未乾而兇賊逞逆實保權不孝所致敢以勞諸君諸君未忘先令公之故戮力同心滅此賊于地下足矣辭氣激昂義形於色軍中無不感泣師璠亦泣顧左右曰汝見即君乎年未成人而

賢若此軍士奮然咸思自効未逾旬大破文表于平津
亭鬻食之餘黨悉平初文表將叛猶豫不定有從者夜
夢文表領上繞一龍文表大喜曰此天命也於是決意
舉兵及敗識者以龍神物而出于領是禍將作神去焉
之兆也文表滅而周氏亦隨亡

僧居遁

僧洪道

報慈長老

僧虛中

至聰禪師

彭幼謙

伊用昌

僧居遁字證空撫州人也少叅翠微又問臨濟復走洞

山就正良价禪師一日叩祖師西來意良价曰待洞水
逆流即向汝道居遁始大悟居久之武穆王延住潭州
龍牙山大闡宗風順寂時有大星墮方丈前

僧洪道不知何許人能通內外諸典道行尤高大為時
人所重天福中居衡州石羊鎮山谷文昭王聞其名徵
為報慈住持洪道不應召王堅欲致之使者相望于路
洪道乃率弟子輩轉徙深山中會百鳥和鳴隨之衆遂
踪跡其處再拜曰大王願與師相見今不輒應命遂入

巖谷和尚即得計矣柰符檄疊至百姓繹騷何洪道領之曰吾為汝行矣比至府王待以國師禮久之固乞歸山不知所終初洪道入山時有虎蹲山乳二子弟子皆大駭洪道咒曰無懼彼行當移去言訖虎銜二子趨出報慈長老失其姓名素有道行能入定觀人休咎文昭王問曰孤子富貴無遺恨所不知者壽耳對曰大王無憂當與佛齊年王薨時正四十九歲

僧虛中宜春人遊瀟湘山

一作居玉筍山

同沙門齊已尚顏栖

塘之徒為詩友已而住湘西栗成寺與王子希振情好甚篤希振迎虛中納之詩閣虛中喜焚火每煙燎閣際彩翠希振復加髹腹不以為忤嘗題希振池亭多佳句希振大加稱賞又時時貽詩司空圖圖亦推重

國有詩云十年

華嚴峯頭住只得虛中一首詩

著有碧雲詩一卷傳世同時湘南僧文

喜乾康亦以詩名文喜失鶴詩乾康咏雪詩皆甚傳湖南

至聰禪師不知所自來居祝融峯清修數十年戒行具

足大有所得一日下衡山見女子紅蓮者睇視良久悅
之遂宿于其家詰旦披衣起沐浴與女子俱化人咸異
之

彭幼謙湘陰人也寒暑惟一羽褐文昭王時自言常葺
丹壇丹竈得大藥一丸餌之歷年百有四十餘歲後不
知所之

伊用昌南岳道士也有異術學士廖匡圖

九國志
作光圖

母病

思鱸值江水暴漲魚不可得用昌探懷得水獺長三寸

許投江中湏臾波浪騰沸擒一巨鱗出作鱠食匡圖母
病尋愈

十國春秋卷七十六



總校官庶吉士臣張能照

校對官檢討臣郭

騰錄監生臣劉

欽定四庫全書薈要

史部

十國春秋卷七十七



十國春秋卷七十七

檢討吳任臣撰

吳越一

武肅王世家上

武肅王姓錢名鏐字具美杭州臨安人也

後改為
安國縣

唐大

中六年二月十有六日生於邑臨水里先是邑中旱縣令命道士東方生起龍以祈雨生曰茅山前池中有龍起必大異令乃止明年復旱生乃遽指鏐所居曰池龍

已生此家時鏐實誕數日矣始誕之夕鏐父寬方他適
隣人急奔告曰適過君家後舍聞甲馬聲甚衆寬疾馳
歸而鏐已生復有紅光滿室寬怪之將棄於水丘氏之
井鏐大母知非常人固不許因小字曰婆留而井亦以

名

羅隱婆留井頌曰於惟此井淨育坎靈有莘有邵實
此諸英時有長虹上貫青冥是惟王氣宅相先徵爰

啟霸主奠綏蒼氓沛膏漸澤配德
東漢井故武肅王外大父所麓也

里中有大木鏐幼時

常與羣兒戲木下

杭州志云木在臨安衣錦山武肅王
微時常戲於此又常避難于其下後

貴顯封為將軍木
更有稱號見後

鏐坐大石指麾羣兒為隊伍號令頗

有法羣兒皆敬憚之未幾鏐祖宙死將葬夜會大風拔樹于野詰旦術者謂鏐父曰此拔樹之穴是天啓也宜以葬已而撫鏐背曰當貴此孫稍長遊徑山有道人洪湮者每僻地相迎不期而遇鏐問故湮曰君非常人故預知耳及壯無賴不事家人生產以販鹽為盜縣錄事鍾起子數人輒與鏐飲博起常禁其諸子諸子多竊從之遊豫章人工天官者望斗牛間有王氣斗牛錢塘分野因遊錢塘占之在臨安乃之臨安以相法隱市中陰

求其人起與豫章人善私謂起曰占君邑有貴人求之
市中不可得視君相貴矣然不足當之起乃置酒悉召
邑中賢豪為會陰人徧視之皆不足當一日豫章人過
起鏐適從外來見起反走豫章人望見之大驚曰此真
貴人也起笑曰吾傍舍錢生耳豫章人召鏐至熟視之
顧起曰君之貴者因此人也乃慰鏐曰子骨法非常願
自愛遂與起訣曰吾求其人者非有所欲直欲質吾術
爾起始縱諸子與鏐遊時時貸其窮乏鏐善射與槊驍

勇絕倫畧通圖緯諸書邑中山有石徑二尺七寸其光

如鏡鏐遊此顧其形服冕旒如王者狀甚秘之

石鏡在衣錦山

太平寰宇記謂鏡起懷戰云云

乾符二年浙西鎮遏使王郢作亂

郢自蘇常

歷浙江寇沿海諸郡浙西節度使裴璩密招降其黨乾符三年郢因温州刺史魯實請降至明州鎮遏使劉巨

容射殺之

石鏡將董昌募鄉兵討賊表鏐偏將擊郢破之鏐

時年二十四也及昌至杭州鏐因事道餘杭有瞽者以摸骨相集龍光橋鏐請相竟無一言未幾歸復贄金請相瞽者曰旁無人乎乃引臂嘆曰天下亂矣暮時之內

再遇貴人言訖而去五年羣盜朱直管曹師雄王知新等剽掠宣歙間繆率兵討平之以功授石鏡鎮衙內知兵馬使遷鎮海軍右職六年黃巢擁衆二十萬大掠州縣兵將及石鏡鎮我衆財三百人繆謂昌曰賊以數萬之衆踰越山谷旗鼓相遠首尾不應宜出奇兵邀之乃與勁卒二十人伏草莽中巢先鋒度險皆單騎繆伏弩射殺其將巢兵亂繆以勁卒蹂之斬首數百級繆曰此可一用耳若大衆至何可敵邪乃引兵趨八百里八百

里地名也告道旁媼曰後有問者告曰臨安兵屯八百里矣巢衆至聞媼語不知其地名皆曰嚮十餘卒不可敵况八百里乎遂急引兵過都統高駢聞巢不敢犯臨安壯之廣明元年杭州始建八都餘杭陳晟於潛吳文舉鹽官徐及新城杜稜唐山饒景富陽文禹一作聞龍泉凌文舉各聚數千人以衛鄉里而臨安則為董昌而

鏐副焉

杭州府志周寶傳云寶發杭州兵戍縣鎮判八都石鏡都董昌主之清平都陳晟主之於潛都

吳文舉主之鹽官都徐及主之新登都杜稜主之唐山都饒京主之富春都文禹主之龍泉都凌文舉主之杜

後傳又云稜為東安都將與臨安董昌錢塘劉孟安阮結富陽聞人宇鹽官徐及餘杭凌文舉臨平曹信號八都所說不同今既而高駢召昌與鏐俱至廣陵駢視鏐從吳越傳吏

謂左右曰此人他日爵祿必過于我久之駢無討賊意昌等不見用辭還駢表昌杭州刺史鏐都知兵馬使太子賓客是時天下大亂昌乃團練八都兵以鏐統之中和二年秋七月浙東觀察使劉漢宏與昌有隙遣弟漢宥馬軍都虞候辛約屯兵西陵以圖浙西鏐率八都兵往討會夜分星月皎然兵不可渡鏐掬江沙吞而祝曰

吾以義兵討賊願助陰雲蔽月以濟我師頃之雲霧晦
暝即渡江竊取軍號斫其營營中驚擾因焚之漢宥等
皆走冬十月漢宏又遣登高鎮將王鎮將兵七萬屯江
干鏐率儒童鎮將徐靖浙江都遊奕使阮結銜枚宵濟
復大破之鎮走諸暨獲漢宏所署偽勅二百餘道是月
唐帝詔鏐兼侍御史三年春三月漢宏分兵屯黃嶺巖
下貞女三鎮及山洞凡九十三所以圖大舉鏐將八都
兵自富陽擊之破黃嶺擒巖下鎮將史弁貞女鎮將楊

元宗夏四月漢宏自領兵屯諸暨古剝嶺至于亭山龜
山之下鏐又擊破之五月漢宏復遣將何肅黃珪等率
本道排門軍營蕭山諸暨等地鏐逆戰破賊一萬餘人
生獲都虞候章公直冬十月漢宏又遣弟漢容與辛約
巴立李萬敵等會兵十餘萬從西陵大出戰船謀夜渡
鏐自新沙由漁浦攻之殺其將何肅遂趨蕭山是月戊
午鏐親與漢宏遇自午至戌破賊大敗之漢宏易服持
贈刀而遁追者及之誑曰我宰夫也舉刀以示得免未

幾漢宏收餘衆四萬復戰鏐又破之斬其弟漢容及將
辛約譚昇巴立李萬敵仍獲漢宏偽淮海招討使印一
鈕漢宏遂遁歸越四年春王鎮執婺州刺史黃碣降于
鏐漢宏乃遣其將婁賚殺鎮而代之夏四月浦陽鎮將
蔣瓌復召鏐兵共攻婺州擒賚而還是時唐帝遣中使
焦居璠為杭越通和使詔昌與漢宏罷兵皆不奉詔漢
宏因殺王人命其將朱褒韓公玖施堅實等以舟兵屯
望海圖水陸並進秋七月唐授鏐國子祭酒兼御史大

夫右千牛衛將軍光啓元年冬十月授鏐檢校散騎常侍右武衛將軍二年春正月鏐謂董昌曰除惡務去根本不爾當為後患願以全師討漢宏即日以諸都兵馬使阮結守梅市監陣使錢爽守雙童過後使駱團守平水降將使章可周唐晟王公備等守蘭頭江海遊弈使崔則守羊石辛亥鏐出平水成及夜率奇兵開道五百里癸丑破朱褒等于曹娥埭甲寅進屯豐山施實堅等執漢宏右直將張師及降丙辰進拔越州漢宏走台州

辛酉戮漢宏妻母弟姪及其黨史惠史侃都虞候蔡約

于軍門冬十二月台州刺史杜雄執送漢宏至命斬于

會稽市

十國紀年作十二月丙午杜雄執漢宏通鑑云十二月杜雄誘劉漢宏執送董昌斬之按十二

月丙子朔無丙午今從通鑑不紀日漢宏斥刑者曰吾廉察也非汝輩可

殺吾常夢手捧金錢殺吾者錢公也乃請鏐親刃焉是

月儒童鎮將徐靖俘掠居人鏐命戮于市北關鎮將劉

孟安與弟孟宿輒起府庫散本部鏐責之孟安因即席

謀鏐鏐立斬以徇悉有其衆越人諸將皆推鏐為主鏐

固讓董昌昌遂權蒞于越杭人復請鏐代董氏時浙西

節度使周寶

寶字上珪平州盧龍人

承制以鏐權知杭州軍州事

兼杭州管內都指揮使未幾唐授鏐檢校尚書三年春正月唐帝在興元勅授鏐杭越管內都指揮使上武衛

大將軍充杭州刺史昌為越州觀察使三月潤州客司

軍將劉浩與後樓兵逐其帥周寶寶奔常州推度支催

勸官薛朗為留後夏四月六合鎮將徐約攻陷蘇州

唐書

云約曹州人

淮南高駢為其下畢師鐸所囚淮南大亂五月

鏐遣東安都將杜稜浙江都將阮結靖江都將成及等
攻常州取周寶以歸鏐具軍禮郊迎館寶于樟亭驛先
是寶蒞丹陽州人凡有期必曰待錢來斯之應也寶尋
病卒

一云鏐殺之年
七十四贈太保

冬十二月鏐命杜稜為常州制置

使遣阮結等進攻潤州是歲唐加鏐檢校戶部尚書文
德元年春正月我師克潤州生擒薛朗剖其心以祭寶
劉浩走免鏐命阮結為制置使又命築嘉興縣城三月
唐加鏐檢校司空又授鏐父寬威勝軍節度推官檢校

尚書賜緋魚袋秋九月鏐遣從弟鍊率兵討徐約於蘇州約盡驅州人守城文其面曰願戰南都從事軍事衙推陳佐車謂人曰南都者國都之稱杭州其終建國乎龍紀元年春三月我師破徐約約敗走入海中箭死鏐命海昌都將沈繁權知蘇州事夏四月丁丑築安衆營于臨安五月甲辰潤州制置使阮結為叛兵所辱病卒鏐以其弟右驍衛將軍阮綽領其本部仍命成及代之及盡誅其叛兵秋七月唐授鏐金紫光祿大夫檢校司

空本州防禦使冬十月唐除給事中杜儒休

唐書作
儒休

為

蘇州刺史以沈粲為制置指揮使十一月宣州楊行密

遣將田頔李友

一作
有

等陷常州執我杜稜而去十二月淮

南孫儒遣其下劉建鋒

一作
封

陷潤州成及奔歸大順元

年秋七月李友

備史作有
今從通鑑

陷蘇州制置使沈粲害刺史

杜儒休及兄延休

一作
述休

而奔杭州

新唐書云
粲害儒休始儒休見攻

也曰勿殺我當與爾金粲曰
殺爾金馬姓與兄述休同死

粲以其失備將誅之粲遂

奔孫儒八月唐加鏐吳興郡開國男閏九月鏐命築新

城環包氏山洎秦望山而迴凡五十餘里皆穿林駕險而版築焉鏐常親勞役徒因自運一甕役徒無不畢力冬十二月唐遣使高品賜官誥加鏐檢校司空同平章事是歲孫儒與楊行密爭常蘇間戰鬪不休二年春正月儒自淮南復入姑蘇將乘勝以圖我鏐出舟師禦之儒遂絕南顧秋七月城東安鎮

羅隱東安鎮新蔡羅城記曰天下自懿考僖皇

之後網領不振即以龐勳蘇牟于前王仙芝踐踏于後尋乃黃巢大掠于京城所以齊寇振臂一噪四海瓦解自爾枝葉蔓引耳聞口吠其或一壘之不僅一板之不嚴則剗剗之不暇雖十室之邑三戶之鄉必壁壘以備

之離落以抗之况大藩之襟帶吾土之翳倚者乎杭之
別郡舊有八都之目其所以破山偷旌八將之功所致
也而東安主領太師杜公尋以擒逆賊薛朗于京口破
丁從實于毘陵天子寵之拜常州刺史遂屬其兵于子
弟焉撫于內者曰建思禦于外而弭寇摧凶者曰建徽
經度于季孟之間者曰建威洎太師解印而歸淮叛賊
偷連壓封部元帥大丞相彭城王始授君以板築之要
濠塹之廣袤地里之橫亘皆取則于丞相一之日鳩其
民人相其險易惟師有令衆克從之二之日度其資費
卜其力用經之營之厥畫惟稟三之日命其將李可球
胡僅等曰汝常從役于杭必能識大丞相意善匠事勿
令不如丞相指揮曰佯汝工曰溫汝率鐸令等二十一
將翼佯以進曰鄧洎儼汝督防遏備禦二都之士卒以
介于佯之左右曰勛汝司吾儲稟謹吾出入城者若有
望惟汝之咎起大順辛亥年秋七月壬戌訖于明年夏
四月庚寅蟠東矗西離連坎接隆者就之寔者盈之民

不弛擔時不妨農夏五月太師猗羣帥于城下若杵若
耨者皆與焉不三四年淮南節度楊氏行審以稱盜承
天剽衝擾我疆境而東安尤為其所忌行密滅安仁義
之精銳分田頤陶雅金威之敢勇以攻東安城樓櫓翔
空矢石交迸翊日我軍憑其城斃賊將于城下者其數
盈千濠塞塹堙自是羣寇不復有圖南之意是知人非
城則無以為捍城非人則無以自固不有城也人何以
安不有將也城何以堅于時紫溪竄堡火口建寧下守
靜江無將奔我而活者四鎮之生聚焉噫天下之無事
也吾鄉則有河間凌準宗一濮陽吳降下已汝南袁不
約還朴以文學進天下之有事也吾鄉則有太師建徽
伯仲及諸將佐以武藝稱豈文武之柄倚伏而然也抑
江山稟受與時消息者乎隱亦常以先師之道干名貢
府進取未半九鼎羹沸文既不用武非所習今則老矣
高謝三軍太師以錫金勒石見徵不冬十二月孫儒燒
敢堅逃乾寧五年六月二十一日記

掠蘇常遂逼宣州因圍楊行密行密遣使求救于我鏐
出糗糧甲兵以助之是月常州甘露鎮使陳可立據本
州鏐遣師復平姑蘇景福元年春二月鏐命從弟鉉為
蘇州招緝使夏四月唐陞杭州為武勝軍授鏐本軍防
禦使六月鏐出師會宣州兵敗孫儒于宣城行密遂斬
儒傳首京師隨以沈粲歸我戮于市是時唐陞越州為
威勝軍以董昌為節度使封隴西郡王又越州有裴氏
書樓昌悉取其書以貢授諸道採訪圖籍使二年夏閏

五月唐授鏐本軍團練使蘇杭等處觀察處置使進封

彭城郡開國侯食邑七百戶秋七月丁巳鏐率十三都

兵

八都外有紫溪保城龍通三泉三鎮是為十三都

洎役徒二十餘萬衆新築

羅城自秦望山由夾城東亘江干薄錢塘湖霍山范浦

七十里

武肅王杭州羅城記曰大凡藩籬之設者所以規其內溝洫之限者所以虞其外華夏之制其

揆一焉故魯之祝丘齊之小穀猶以多事不時而城況在州郡之內乎自大寇犯闕天下兵革而江左尤所繫

併余始以郡之子城歲月滋久基址老爛狹而且卑每至點閱士馬不足廻轉遂與諸郡聚議崇建堆堞夾以

南北轟然而峙帑藏得以牢固軍士得以帳幕是所謂國吾圍以是年上奏天子嘉予拙政優詔獎師以為牧

人之道其盡此乎俄而孫儒叛蔡渡江侵我西鄙以剪
以逐蹶于宛陵勁弩之次泛舟之助我有力焉後始念
子城之謀未足以為百姓計東眇巨浸繫閩粵之舟楫
北倚郭邑通商旅之寶貨苟或侮劫之不意攘偷之無
狀則向者吾皇優詔適足以自策由是復與十三都經
緯羅郭上上下下如響而應爰自秋七月丁巳訖于冬
十有一月某日由北郭以分其勢左右而翼合于冷水
源綿亘若干里其高若干丈其厚得之半民庶之負販
童髦之緩急燕越之車蓋及吾境者俾無他慮千百年
後知我者以此城罪我亦以此城苟得之于人而損之
已者吾城門凡十曰朝天門西湖志曰朝天門樓臺疊
石高四尺有四尺東西五
無媿歟

十六步南北半之中為通道橫架交梁承以藻井牙柱
壁立三十有四西閤門對闢名曰武臺平敞可容兵士
百許臺左右北轉登石級兩面達于樓上樓之高曰龍
六段有四連基而會十有一段貯鐘鼓以司漏刻

山門曰竹車門曰新門曰南土門曰北土門曰鹽橋門
曰西關門亦名涵水門曰北關門曰寶德門其營屯凡

六曰白璧營寶釵營青字營福州營馬家營大路營

按白

璧營在今城南土隅寶釵營在今鍾公橋北青字營在
今鹽橋東福州營在今梅家橋東馬家營在今修文坊
內大路營在
今橋家塘九月唐授鏐鎮海軍節度使潤州刺史乾

寧元年春二月鏐命成及權蘇州刺史三月唐詔鏐自
光祿大夫檢校司徒進充本道營田招討鹽鐵制置發
運等使夏五月唐遣中使劉延鉅特授鏐開府儀同三

司同中書門下平章事六月唐遣中使賈居蟾賜鏐私

門立戟

錢氏家乘云詔加鏐父寬朝散大夫檢校禮部尚書賜第茅山子姓一十六技並立門戟

二

年春二月進封鏐開國公食邑一千戶是月威勝軍節

度使董昌反昌素愚不能決事臨民訟命以骰子擲之

勝者為直既而恣為誅戮越州白樓門外故行刑之地

守者恒聞鬼哭不絕凡軍中制度多所改易隸中軍者

衣黃隸外軍者衣白背印威儀二字其器玩無大小盡

號以元字軍中文臂者亦如之識者以為元者錢文也

終當歸錢氏昌建生祠諸郡置土馬有誑言馬嘶發汗者畢受賞又王守貞者俗謂之王百藝性極機巧命彫刻將吏木偶悉用長釘鉗其足曰更二三百年免有顛踣至是盈滿愈甚遂圖僭亂妖人應智王溫巫韓媼等以妖言惑昌有老人獻偽謠曰欲識聖人姓千里草青青欲知天子名日從日上生昌贈老人百縑復有道士朱思遠詭言天符夜降碧楮朱文不可識大約言天命在董氏也于是俗吏致龜魚符瑞者日不下百數昌乃

集無賴子斷腕截耳號曰感恩都以備腹心牙將倪德
儒謂昌曰曩時謠言有羅平鳥四目三足主越人禍福
民間多圖其形禱祠之視王書名與圖類因出圖示昌
昌大悅而僚佐都虞候李暢之掾吏吳瑤秦昌裕輩復
從史昌言王常求為越王曷若為越帝昌遂自稱皇帝

國號大越羅平

舊唐書云昌借號稱平羅國似誤

改元順天署城樓曰

天冊之樓

羅隱吳越行營露布曰羅平者啓國之名順天者建元之始又曰將軍門稱天冊之樓以

會府為宣室之地據此則昌之年號藉神錄以為天冊舊唐書以為大聖皆非也

命羣下稱已

曰聖人繡中軍外軍之衣曰歸我僭立時凡年月日時
皆用卯蓋按古識書江東岼上重日生昌既以名應之
復取卯以符日出義也

一云昌曰識言先上金牀我生于卯明年歲旅其次二月朔之

明日皆卯也我以其時當即位又稽神錄云是時州寢有光長十餘丈也長尺餘金色見思道亭昌署寢曰明光殿亭曰黃龍殿以自神副使黃碣切戒昌曰今王室雖衰天人未

厭大王興于猷畝位兼將相富貴極矣何忽為滅族之
計昌使人斬碣持其首至詬曰此賊負我好聖明時三
公不肯作乃求死邪投之園中會稽令吳鐐言大王不

為真諸侯乃欲假天子以取滅亡山陰令張遜亦言大
王建節浙東二十年何效李錡劉闢之所為昌皆殺之
以婺州刺史蔣環為宰相遂移書于鏐告以權即羅平
國位印文曰順天治國之印以鏐為兩浙都指揮使鏐
得書召賓客議曰董氏昔吾鄉黨也今吾隣藩也其豐
功茂績崇名厚祿又吾所以贊成也今採聽妖妄甘心
叛亂吾受朝廷將相當徵兵以討之先貽昌書曰與其
閉門作天子與九族百姓俱陷塗炭豈若開門作節度

使終身富貴昌不聽鏐以反狀聞仍親率兵至迎恩門

望樓再拜曰董氏於吾有恩不可遽伐遣幕客沈滂諭

之曰大王奄有數州非不貴矣非不富矣一旦顛倒兵

柄改易臣節自貽伊戚禍不旋踵今率諸兵至城下俟

大王改過苟不見聽則天子赫怒羽林黃頭濟江而襲

大王之城非惟大王有累卵之危實鄉黨生靈偕歸鼎

鑊矣昌以錢二百萬犒軍執應智等送軍前自將待罪

鏐遂誅應智等而還復表其事時越州都指揮使馬綽

指揮使駱園出降俄而唐帝詔鏐討昌又勅遣中使高
品李重密來勞我師仍削奪昌官爵夏四月辛卯蘇州
雨雪乙巳鏐父寬卒

錢氏家乘云寬字弘道乙卯四月十八日卒年六十一

唐遣

祭贈寬尚書左僕射六月唐授鏐檢校太傅彭城郡王

浙江東道招討制置兩浙鹽鐵發運等使初咸通中京

師有望氣者言錢塘有王者氣乃遣侍御史許渾中使

許計賁壁來瘞秦望山之腹以厭之使回望氣者言必

不能止至是遂驗

又郭璞撰臨安地志云天目山前兩乳長龍飛鳳舞到錢塘海門山起橫

為案五百年生異
姓王至是亦驗

是月王起師討董昌秋七月唐授王

起復雲麾將軍上金吾衛大將軍員外置同正員八月

董昌復拒我師求援于淮南弘農王楊行密九月弘農

王行密遣將臺濠等圍蘇州以應昌冬十月弘農王

行密又遣安仁義田頤等攻我鎮戍昌遣裨將陳郁鍾

福屯香嚴寺又遣李蕙崔溫屯于石候王命武勇都指

揮使顧全武馬步軍都知兵馬使王球率兵往逐之遂

戮蕙溫等未幾昌復構湖州刺史李師悅率兵四千餘

人侵我封境又遣徐淑困我嘉興王命內衙都虞候方
密襲之不克更命顧全武率所部禦之因破烏墩光福
二砦會大江沙路平漲賊得布游兵往來王謂全武等
賊若有我江壩襟帶甌越則不可當也汝善禦之十一
月衢州刺史陳儒卒弟岌嗣時顧全武遣偏將孟寶將
燔率兵屯于西陵是月唐勅王依前起復檢校太傅兼
侍中加食邑一千戶是歲王奏封胥江伍子胥為惠應
侯先是作羅城時江濤勢激板築不能就王禱之沙漲

一十五里故有是命

乾寧三年春正月安仁義從湖州將渡江以應董昌王
遣顧全武及武勇都知兵馬使許再思守西陵以禦之
仁義竟不敢渡是月昌遣徐珣李玄賓等據肅清四朴
九鄉之地王命顧全武王球擊之徐珣等來降昌又遣
將湯鶚通鑑作湯曰今從吳越傳史領兵守石城石城山在山陰縣東北三十里袁
邠領兵守永寧時昌鎮遏使朱威與賀蘭風招緝使孫
仲殷等並投款于王威等由海道而至二月王命顧全

武許再思自西陵趨石城與湯舊遇遂破石城舊等走
還三月我師復攻餘姚袁邠因大戰賊黨逃溺者相半
時明州刺史黃晟遣指揮使梁從旺率兵來應我師邠
堅壁自固昌益兵以救之顧全武遣武勇隊主劉彥章
截其衝要生擒賊將徐宣斬首二百餘級昌又遣暨陽
鎮將陳郁自南秦了口至于富陽漁浦等處屯聚王命
王球等擊之郁率其黨來降夏四月我師執袁邠及偏
將潘薦等凡二千餘人王以朱威復為永寧鎮使是月

顧全武進圍越城五月辛巳董昌親閱戰于五雲門仍

懸玉帛以誘我師顧全武許再思等奮擊之其黨大敗

昌愕視而退始惧自去其帝號次日王命分兵進攻以

全武充諸軍都虞候東面都知兵馬使與指揮使孟寶

等攻五雲門王球充右副指揮使與蔣燾等攻亭山及

中光門陳璋充右副指揮使與錢顏攻關子門再思充

馬軍都虞候北面都知兵馬使攻昌安門駱團充四面

都指揮使攻迎恩門癸未越城垂拔會臺濛等陷我姑

蘇刺史成及被執王乃召全武議將分兵西陵以備北

寇全武上言曰賊之根本繫于甌越豈以失一姑蘇遂

這天討願先拔越城然後復茂苑未遲王從之乙未董

昌猶據牙城拒我兵王始云奉詔令大王致仕歸臨安

昌乃送牌印出居清道坊全武使上武勇都監使吳璋

執昌至而斬之

歐陽史云全武執昌歸杭州行至西小江昌顧左右曰吾與錢公俱起鄉里吾

常為大將今何面復見之乎左右相對泣下因瞋目大呼投水死今從備史

越州平王命散

府庫金帛以賞將士開倉廩以賑貧乏

昌積米三百萬斛

又斬

偽宰相李邕、蔣環等十餘人，以下脅從者悉宥之。

昌有五千人

餘姓當族誅，因貸其死而厚養之名為感恩都。

秋八月，唐帝授王檢校太尉兼

中書令，加食邑一千戶，實封一百戶，賞去偽功也。仍遣

供奉官竇全道賜王旌節，又遣中使韓彞範來宣諭，將

授王越州王，辭讓久之。唐遂除宰相王溥鎮越州，王復

諷兩浙吏民上表請以已兼領浙東。冬十月，唐帝勅改

越州威勝軍為鎮東軍，授王領鎮海鎮東等軍節度使。

十一月戊子，湖州刺史李師悅卒。子繼徽嗣。是月，安仁

義由南蕩率餘黨攻東陽刺史王壇堅壁自固

乾寧四年春正月王命行軍司馬杜稜都監使吳璋率兵救東陽安仁義復攻睦州一夕大風雨賊衆驚擾而遁夏四月命顧全武與王弟鎮武勝軍都指揮使沈夏陳璋高遇許再思等率兵自海道以救嘉興時諸將皆欲緩進惟全武請倍道兼行王從之一日師次嘉興嘉興圍逼已久遽見我旗號皆大悅是日遂內外夾擊擒賊李宗禮偏將顧金等二十餘人乘勝大破賊寨十有

八所又擒賊將魏約張宣楊燔閭建等士卒三千餘人
嘉興平全武等又乘勝逐田頔于驛亭埭適電火焚頔
營震折威鎗頔由吳興而遁於時大水我師逐之斬馘
沉溺者幾數十里六月己酉王如越州受鎮東節鉞秋
七月庚寅王至自越州還治錢塘號越州為東府命顧
全武率師復蘇州乙未拔松江戊戌拔無錫辛丑拔常
熟華亭八月我師屯崑山唐勅王起復加食邑一千戶
又遣中使焦楚鎰賁鐵券至券文曰維乾寧四年歲次

丁巳八月甲辰朔四日丁未皇帝若曰咨爾鎮海鎮東
等軍節度浙江東西等道觀察處置營田招討等使兼
兩浙鹽鐵制置發運等使開府儀同三司檢校太尉兼
中書令持節潤越等州刺史上柱國彭城郡王食邑五
千戶實封一百戶錢鏐朕聞銘鄧騭之勲言垂漢典載
孔惺之德事美魯經則知褒德策勛古今一致頃者董
昌僭偽為昏鏡水狂謀惡跡漸染齊人爾能披攘兇渠
盪定江表忠以衛社稷惠以福生靈其機也氛祲清其

化也疲羸泰拯於粵於塗炭之上師無私焉保餘杭於
金湯之固政有經矣志獎王室績冠侯藩溢于旂常流
在丹素雖鍾繇刊五熟之釜寶憲勒燕然之山未足顯
功抑有異數是用錫其金板申以誓辭長河有似帶之
期泰華有如拳之日惟我念功之旨永將延作子孫使
卿長襲寵榮克保富貴卿恕九死子孫三死或犯常刑
有司不得加責承我信誓往惟欽哉宜付史館頒示天

下

王謝表曰臣銖言伏承恩旨賜臣金書鐵券一道恕
臣九死子孫三死者出於唐券形此綸言錄臣以絲

髮之勞賜臣以山河之誓鐫金作字指日成文震動神祇飛揚肝胆伏念臣爰從筮仕迨及秉麾每自揣量是何叨忝所以行如履薄動若持盈惟憂福過禍生敢忘慎初護末豈期初志上感宸聰憂臣以處極多危慮臣以防微不至遂開聖澤永保私門屈以常刑宥其不死雖君親屬念皆云必恕必容而臣子為心豈敢傷慈傷愛謹當日慎一日戒子戒孫不敢因此而累思不敢乘此而賈禍聖主萬歲愚臣一心是月唐封

胥江惠應侯為吳安王先是安仁義將沿江入寇一夕

驚濤沙路盡毀王感其神異請而封之九月湖州刺史

李繼徽以州附淮南牙將沈攸拒之繼徽遂出奔乙未

王親巡湖州收繼徽家屬而還湖州平王命海昌鎮將

高彥為湖州制置使冬十月淮南以臺濠守蘇州十一月己卯台州刺史杜雄卒

乾寧五年春正月命師救蘇州生擒淮南將李近思斬首一千餘級殺其將梁琮張顥等淮南將李簡復率兵五千餘人屯無錫我師攻之獲其偏將陳益等而還是月王以越州指揮使駱團為台州制置使二月唐帝勅移鎮海軍於杭州從王請也又授都押衙董匡等恩命有差三月淮南將周本救蘇州顧全武擊破之淮南將

秦裴以兵三千拔崑山而戍之秋七月唐授王檢校太師賜號定亂安國功臣八月唐改元光化九月顧全武攻蘇州臺濛李德誠等棄城走遂復取蘇州追敗周本於望亭進拔崑山降其將秦裴是月婺州刺史王壇遣將攻東陽王以息民故命使諭之冬閏十月王以嘉興都將曹圭權蘇州制置使尋命為本州刺史是月王壇抗命王遣師伐之唐勅王兼兩浙安撫使加食邑一千戶實封一百戶十一月衢州刺史陳岌貳於我請降於

淮南王遣顧全武等討之十二月淮南以成及易魏約許之先是陸郢之叛及為淮南所鹵至是歸

光化二年春正月我師大敗陳岌於龍丘二月唐遣高臨周道安改王本縣石鏡鄉為廣義鄉臨水里為勲貴里所居安衆營為衣錦營仍賜兩浙行軍司馬杜稜以下一百二十人並號贊忠去偽功臣三月王壇求救於淮南夏四月唐勅升杭州為大都督府是月淮南田頔遣行營都指揮使康儒等來應東陽王命副指揮使方

密羅聚等濟師於婺州及蘭谿義烏等縣五月庚戌儒
敗我兵於龍丘偏將王球被鹵未幾釋歸秋七月淮使
自衢州還者為我師所殺仍獲陳友送楊氏地圖州印
以歸是歲奏封蕭山縣神孔大夫為惠人侯

隋大業中有孔大夫

者為陳仁果裨將討東陽賊婁世幹降
之立廟黃山至是王上其事封以侯爵

光化三年春正月淮南將康儒徐從臯等攻睦州王命
從弟鉅拒之夏五月唐遣中使王金峰賁詔封王為南
康王加食邑一千戶實封一百戶王表陳讓秋七月重

修大滌山天柱觀

武肅王天柱觀記曰天柱觀者因山為名按傳記所載皆云天有八柱其

三在中國一在舒州一在壽陽洎今在餘杭者皆是也又按道經云天地之內有十大洞天三十六小洞天如國家之有藩府郡縣遞相稟屬其洞天之內自有日月分精金堂玉室仙官主領考校災祥今天柱山即真誥所謂大滌洞天者也內有隧道暗通華陽林屋皆乘風馭景倏忽往來群真杳冥非世俗所測而況大江之南地兼吳越其峯巒西接兩天眼之龍源次連石鏡之嵐岫東枕浙江之迢派可謂水清山秀兼通大海及諸國往還此外又有東天目西天目及天竺之號得非抗蒼涯於穹昊聳絕竚於雲霄立天為名以標奇持耶若乃登高遠望則千巖萬壑金碧堆疊龍盤虎踞靈粹滋孕代生異人非山秀地靈之所鍾襲其孰能與於此乎就中天柱風清氣和土腴泉潔神蛇不蛰猛獸能馴自漢武帝酷好神仙標顯靈迹乃於洞口建立宮壇歷代祈

獲悉在此處東晉有郭文舉先生得飛化之道隱居此
山羣虎來柔史籍所載乃於蝸廬之次手植三松虬偃
鳳翔蒼翠千載今殿前者是也洎大唐創業以玄元皇
帝為祖宗崇尚玄風恢張道本天皇大帝握圖御宇授
錄探符則有潘先生弘演真源搜訪神境弘道元年奉
勅創置天柱觀焉仍以四維之中壁封千步禁彼樵採
為長生之林中宗皇帝玉葉繼昌玄闕愈闢特賜觀莊
所以結香燈於是臺殿乃似匪人工廊檻而皆疑化出
星壇月砌具體而微則有被褐幽人據梧高士挹澄泉
之味息青蘿之陰葉天師法善朱法師君緒吳天師筠
簞天師齊物司馬天師承禎夏侯天師子雲皆繼踵雲
根棲神物表骨騰金鎖名冠瑤編出為帝王之師歸作
神仙之侶金錯標宇翠珉流芳昭析具存不俟詳錄其
餘三泉合派雙石開扉藥園新池古壇書閣各有題品
足為耿光鏐此際蒙聖朝疊安藩閭綰閭閻之封畧統
勾踐之山河寵極蕭曹榮兼渾郭緬懷斯地實通維桑

素仰真風備詳前事但以此觀創置之始本對南方後有朱法師相度地形改為北向雖依山勢偏側洞門其洞首陰背陽作道宮而不可致左右崗壠與地勢以相連背洞門而不順百靈使清泉却侵白虎致使觀中寥落難佳賢能皆為尊殿背水激衝之所致也乾寧二年鏐因歷覽山源周遊洞府思報列聖九重之至德兼立二軍百姓之福庭于是齋醮之餘偏尋地理觀其尊殿基勢全無起發之由致道流困窮二時而不辦香燭竟歲而全無醮閱遂抗直表上聞聖聰請上清道士閻丘方遠與道衆三十餘人主張教跡每年春秋四季為國焚修鏐持與叛建殿堂兼移基址山勢有三峯兩乳兼許邁先生丹竈遺跡猶存遂乃添低作平減高為下改為甲向是五音第一之方而乃添培乳山却為主案尋即一二年內法主兩霑渥恩道侶益臻常住咸備青牛白鹿堪眠琪樹之陰絳節霓幢不絕星壇之土得不因移山勢而再振玄風者哉尋又續發薦章奏閻丘君道

業聖上以仙源演慶真派流輝方瑤水以遊神復華胥
而入夢欲闡無為之教欣聞有道之人勅賜法號為妙
有大師兼加命服雖寒衲帶索之士不尚寵榮在法橋
勸善之門何妨顯赫其次畢法道士鄭茂章生自神州
久棲名嶽玄機契合負笈俱來鏐幸揖方瞳常留化竹
副妙有大師三元八節齋醮同修福既薦於宗祧惠頗
霑于軍俗尋發特表蒙鴻恩繼賜紫衣焚修于此其大
殿之內塑天尊真人龍虎二君侍衛無闕其次別創上
清精思院為朝真念道之方建堂廚乃陳鼎擊鐘之所
門廊房砌無不更新天風每觸于庭除地賴時聞於聽
戶兼為親隸觀額以炫成功非矜八體之能賞立永年
之志妙大師問丘君靈芝稟異皓鶴標奇誕德星躔披
靈霓洞朝修虔懇科戒精嚴實紫府之表儀乃清都之
輔弼加以降神之地即舒州之天柱山也遊方有志躡
屨忘疲自生天柱之前駐修天柱之下察其符契信不
徒然乃此修崇實為搜抉所謂道無不在代有其人爰

自開基至于功畢備仙家之勝槩暢聖祖之真風遂錄
畫圖封章上進奉光化二年十一月二十七日詔旨勅
錢鏐省所奏進重修天柱觀圖一面事興悉我國家集
慶仙源遊神道域普天之下靈迹甚多然自兵革薦興
基址多毀况茲幽邃豈假修營卿考輯圖經知列聖崇
奉親臨勝概重葺仙居仍選精懇之流虔備焚修之禮
冀承玄貺來祐昌期豈惟觀好事之方抑亦驗愛君之
節既陳章奏披覽再三嘉嘆無已想宜知悉冬寒卿比
來安好遣書指不多及懿夫地出靈阜天開洞宮三皇
之前真聖非一莫非乘虛躡景出有入無雖或掛于傳
聞不可知其名氏皆分洞天而理即大滌居其一焉天
柱觀即漢以來迄于唐室修真之士繼躡清塵當四方
取擾之時見一境希闕之趨今也仙宮巍立高道雲屯
六時而鐘磬八節之修齋罔闕有以保國家之景祚福
兩府之蒸黎鏐今統吳越之山河官超極品上奉宗社
次及軍民莫不虔仰神靈遵行大道時也聖明當代四

海歸心忝蒙委以東南封爵功臣兼頒金券家山衣錦
兼兩道之油幢上承一人倚注之恩次荷真正護持之
力玄元至聖崇敬福生大道真科是無為化致乃及身
於此合刊貞石用俟後賢時光化三年七月十五日記

八月唐授王行軍司馬杜稜檢校太子太保庚申龍鬬
于浙江因過郭郭壞廬舍或吸居人浮空而去數里方

墜有至死者是月我師敗淮南兵于軒渚遂絕其糧康

儒等由清溪而遁九月王壇奔宣州辛卯王親巡婺州

命浙西營田副使沈夏權婺州刺史壬辰東陽鎮將王

永伏誅

永東陽人也在鎮治城壁置鼓角粧樓舞榭甃
棟相接又采妖妄立十瑞亭將規本郡及王壇

攻之王以前年婺民為安仁義所撓遣使諭壇罷兵將
追永歸于府城而壇不從命故伐之事平責永以不敬
斬之以謝百姓甲午王巡衢州陳岌降王以岌為浙東安撫副

使命顧全武權知衢州事是月龍關浙江水中冬十月
唐遣中使取王形圖凌煙閣王寫容以進十一月劉季

述等幽唐帝于問安宮立德王裕為帝遣使進王為東
安王王不受命是月己酉葬皇考于臨安縣錦北鄉清

風里是歲王建鎮海軍使院

羅隱記曰惟天子建國必
惟九牧九牧既序區分局

署兩漢三公府有掾屬魏晉而降則置行臺若魏以秦
王儀鎮中都高齊以辛術監治東徐州事皆行臺之任

也其官屬則令僕以至于尚書丞郎唐制由行臺而置
採訪使殆今節制之始也鎮海軍舊治京口大丞相以
錢塘之衆東捲漢室西邁逆朗天子不欲易其土故自
符竹四命然後移軍于錢塘生物以宜租賦以便斥去
舊址廣以新規廊開閣拔起階級俾幢節之氣色貌
虎之出入得以周旋焉庚申年始闢大廳之西南隅以
爲賓從晏息之所左界飛樓右劇嚴城地聳勢峻面約
背敵肥楹巨棟間架相稱雕煥之下朱紫冉冉非若越
之今而潤之富也疆場之事則議之於斯聘好之禮則
接之於斯生民之疾痛則啓之於斯軍旅之賞罰則參
之於斯非徒以酒食駢羅而語言嘲謔者也其府屬已
下或入都舊將或從公于征或稟之于朝庭或拔之于
鄉里故天子用清宮傳道之選以佐之教民論道之
任以副之其餘省秩卿曹職領相次自我朝藩服官屬
之盛無加也噫大丞相之勲德既歲之天府而攀鮮附
翼者非錫刻礫石其可久乎是年冬十月始命觀察判

官羅隱
為記

光化四年春正月唐帝反正勅遣供奉官吐突令鐸來
宣諭仍賜國信二月王親巡衣錦營大會故老賓客山
林樹木皆覆以錦幄號其幼所常戲大木曰衣錦將軍
命指揮使陳璋為衢州制置使夏四月丁丑唐大赦改
元天復是日王親巡東府五月唐授王守侍中進彭城
王加食邑一千戶實封一百戶仍陞王所居衣錦營為
衣錦城封石鏡山為衣錦山大官山為功臣山秋八月

唐遣使授王子傳瓘禮部尚書遙領邵州刺史九月王以衡州制置使陳璋為本州刺史壬子王妣秦國太夫人水丘氏薨冬十月淮南將李神福等入寇王命顧全武方密率師禦之全武等遇伏兵于青山被執神福進攻臨安秦祖率衆降之十一月唐帝狩于鳳翔王聞之悲泣遣使奔問帝嘉之賜王御服夾襖子一副仍降御札于衣襟焉十二月王與李神福和神福受攜賂而還是月唐勅王起復雲麾將軍上金吾衛大將軍員外置

同正員

天復二年春正月閏遣使來致祭

祭文曰維天復二年歲次壬戌敬祭于故

秦國太夫人之靈夫生帝王則若文母方鍾至聖生人臣則若陶母方降大贊信夫輻昴宿之耀于胸襟掬萬山之氣為懷抱豈容易哉伏惟明靈天資婦道神授母儀金石不足喻其貞明芝蘭不足表其芳馥訓逾孟織智邁謝國顏氏子則提育聖人曹大家則師資諸女既作閨門之上瑞乃生英桀於皇家立曠代之鴻勳擁兩藩之龍節食則萬錢調膳祿則三世及親見綠衣則衣錦之姿見冰鯉則和羹之味騰輝女史興詠國風推於古今實無倫比乃由懿德致此大榮嗚呼靈藥難求流光易謝本真霜松而永壽忽驚風燭以斯零竟成翠世之悲傷空切至誠之號慕審知幸攀令嗣獲忝親隣論交既契於金蘭抹泣乃同於親屬輒陳薄奠用表悲誠

敢異明靈
依稀歆鑒

三月癸丑至乙卯三日浙右大雪盈丈

文獻通考

作天復二年三月浙西大雪平地三尺

雪氣如煙而味苦夏四月淮人以

顧全武方密歸我王亦以秦裴報之是月唐加王食邑

一千戶實封一百戶五月

望日

唐封王為越王制曰惟

天作元后所以保茲黎元惟王親諸侯所以建我藩屏

蓋一人不能以獨任故列辟布於四方自昔權輿匪今

作備檢校太師守尚書侍中兼中書令上柱國彭城郡

王錢鏐浙江孕靈天目鍾秀武足以安民定亂文足以

佐理經邦屬天步之維艱援筆而起憤皇靈之弗振枕
戈不忘人方效忠天未厭亂漢宏託金刀之識董昌借
越鳥之妖爾獨憂僭偽之爭強共行天討雪朝廷之深
憤自造地維屢挫淮封式遏廣寇俾兩浙郡邑永保金
湯之固屬部人民永享衽席之樂爾四國有西歸之望
予一人無東顧之憂也昔平王東遷庸依晉鄭典午南
渡允賴并涼卿之封地朕在不蔽援番君

闕

環勾

踐之舊疆建爾真王尹茲東夏於戲節制兩藩車徒萬

乘有予奪死生之權驕心易滿有人民社稷之奉侈心
易生不存忠義之心曷保功名之盛書曰惟命不于常
道善則得之不善則失之常厥德保厥位欽哉欽哉勿
替朕命可進封越王增食邑一千戶實封一百戶餘如
故庚戌溫州刺史朱褒卒兄教代之

中和元年永嘉朱
褒寇溫州二年浙

東觀察使劉漢宏招之因奏褒為溫州刺史大順元年
褒兄誕為溫州刺史乾寧元年褒兄著為溫州刺史天
復元年褒再任刺史二年褒卒兄教自為溫
州刺史兄弟互據凡二十二年見溫州府志秋七月王

親巡衣錦城治溝洫八月丙戌將還府城親饗將校武

勇右都指揮使徐綰謀為不利辭以疾王惡之命綰先

還次日王發自衣錦城綰還作亂武勇左都指揮使許

再思以兵迎綰同叛將及內城王子傳瑛

一作元瑛

與三城

都指揮使馬綽牙將陳為等發懸門以禦之王次龍泉

聞變疾驅至城北時牙將潘長與綰遇斬首二百餘級

綰退營于龍興寺王微服至德勝門牙將周肅遣鍾審

以舟迎王王遂沿江至內城東北踰城而入人莫有知

者北門直更卒憑鼓而寐王親斬之隨命都監使吳璋

三城都指揮使馬綽守北門內城都指揮使王榮武安
都指揮使杜建徽守南門又命指揮使顧全武率兵衛
屯東府全武上言東府不足慮綰勢急必召田頔王當
以難告楊公杜建徽亦言楊氏常由王脫孫儒之難彼
丈夫者豈不能報王王遂命全武攜子傳璫求昏于吳
是時湖州刺史高彥遣其子渭偕指揮使屠瓌智入援
綰伏兵靈隱山渭等被害王命渭所部營城南九月徐
綰召田頔攻杭州頔引兵赴綰遣客吏何饒謂王曰相

公請大王東之越府虛府署以相待王復曰軍中叛亂
何方無之公為節帥乃助為逆乎既而願至泊于北門
以旗鼓自蔽王登城注弩中其執旗者願見王城中大
鼓噪懼退還營遷逼於西北隅願伺夜梯撞畢集城中
矢石如雨賊墜溝洫者不可勝計遂拔營而退十一月
願復具舟楫將渡江絕西陵王命副指揮使盛造朱郁
大破之吳王亦使人召願曰不還吾且使人代鎮宣州
既而願遂率徐綰許再思歸宣州王致犒師錢一百億

以送之

通鑑云顧徽搞軍錢二十萬緡今從吳越備史

顧慮為我師所逐請質

王子傳瓘而去十二月浙右又大雪江海冰

一作三年十二月

是月温州裨將丁章逐刺史朱敖敖奔福州章遂據郡

是歲有白鳥棲于安固縣之集雲山事聞于朝詔改安

固為瑞安縣

天復三年夏四月温州丁章為木工李彥所殺裨將張

惠據温州是月城婺州秋七月睦州刺史陳詢叛舉兵

攻蘭溪王遣指揮使方永珍等率師討之九月田頔安

仁義叛淮南吳王行密乞師于我王命方永珍率師屯
潤州從弟鎰率師屯宣州以應淮南又命指揮使楊習
代永珍于睦州冬十一月田頔敗死頔母奉王子傳瓘
來歸是時王建亭于虛白堂之基曰八會亭以平吳定
越講武計議凡八會于此也未幾更名都會堂又建閣
于設廳之後名曰蓬萊

按直儀門
曰設廳

天復四年春正月唐帝發長安三月唐遣衛尉卿許渾
來宣諭仍賜國信是月王子傳瓘與其婦楊氏并顧全

武至自淮南夏四月唐帝至洛陽大赦改元天祐王求
封吳越王唐帝不許梁王全忠為言于執政乃遣給事

中鄭祁

一作祈

刑部員外郎楊承休

一作永休又作永承
今從歐陽修文集

進封王為吳王勅曰朕嗣登大寶統理萬方有推誠待
人之心少撥亂反正之畧京畿叛亂宗廟震驚採周公
洛邑之謀定商王遷殷之業當茲更始式表殊勲檢校
太師守兼中書令上柱國越王錢鏐一代偉人三朝元
老定哀救亂素存忠義之心濟世經邦夙擅英雄之志

鄉兵一起義聲四馳黃鉞初麾江表大定包茅時登乎
天府版籍歲貢于有司日月塵昏牛女尋常拱北淮河
鼎沸浙江日夜朝東用徙於越之封大畀勾踐之境爾
其糾率侯服翼戴中朝選將練兵務農積粟進可恭桓
文之烈退可守吳越之區寧俾古人專美前史於戲夫
差適顛沛之際罔替尊周仲謀方爭攘之時猶知有漢
況爾名德殿此大邦必能弘濟艱難一匡天下予一人
實有賴焉詩不云乎幹不庭方以佐戎辟爾尚勉旃可

徙封吳王加食邑二千戶實封二百戶餘如故秋八月
唐帝崩太子即位謚帝曰昭宗遣使來宣告王素服舉
哀于軍門是月淮人輓送徐綰歸我王命剖心以祭高
渭九月壬戌朔大風寒如仲冬浙東西大雪冬十月朔
日有食之癸酉大雪平地丈餘十二月衢州制置使陳
瑋殺羅城使葉讓叛降于淮南

天祐二年春正月唐授王子傳瓘官爵是月我兵圍陳
詢于睦州吳王行密遣西南招討使陶雅同閻鉉等來

據新安王命從弟鎰與指揮使顧全武王球禦之我師
不利鎰及球等被執夏四月陳璋會睦州兵及淮南將
陶雅等同攻東陽王命弟鏐率師討之秋八月處州刺史
盧約使其弟佶攻陷温州張惠奔福州王命方永珍
濟師于東陽會師討賊九月陳璋陶雅陷東陽執我刺
史沈夏吳王行密以雅為江南都招討使歛婺衢睦觀
察使璋為衢婺副招討使璋復分兵與淮南將許野鶴
等犯我暨陽王命楊習逐之璋兵大敗習遂攻東陽冬

十月有獸入吳興一角而麟趾十一月王命建功臣堂于府門之西樹碑紀功仍列賓僚將校賜功臣名氏于碑陰凡五百人十二月睦州刺史陳詢奔淮南陶雅入

據睦州

中和四年陳晟據睦州至詢而敗

天祐三年春正月丙寅唐帝命所司擇日備禮冊王

舊唐

書云制定亂安國功臣鎮海鎮東節度浙江東西道觀察處置等使開府儀同三司守侍中兼中書令杭越兩州刺史上柱國吳王食邑九千戶實封五百戶錢鏐總領兩鎮制撫三吳道逢阻艱未行冊命宜令所司擇日
是月淮南將陶雅引兵歸歙州我兵復取睦州宣州

觀察使王茂章來奔王以為鎮東節度副使更其名曰

景仁二月辛卯王如睦州陳璋自婺州退保衢州方永

珍楊習等取婺州進攻衢州三月命浙西營田副使馬

綽權睦州刺史秋八月陳璋導淮南將周本呂師造等

入衢州為我師所逐遂奔淮南九月周本等率其黨歸

信州王命方永珍為衢州制置使是月唐遣使臣王鉅

吳越備史作右
散騎常侍王鉅

裴筠

備史作司勳
郎中裴矩均

授王吳王竹冊

冊文
曰皇

帝若曰惟后法天以降命式協無私惟臣體國以垂功
乃興厥后周裂宗盟之土漢分子弟之邦非劉式論於

諸儒同姓亦識於太史疇庸懋賞是曰能若顧茲眇躬
實屬多難允賴元勲廓清寰宇憫予怠荒保我不嗣舉
同心協力者無虛日推秘畧宏謀者無間時俾列疏封
以昭勲績況江山右地吳越名區百雉則前朝舊都會
稽則夏后遺址宜旌社土以統藩維咨爾檢校太師守
侍中兼中書令上柱國錢鏐大昴流精維萬孕祉萃東
甬秀異之氣鍾文武英畧之資奮茲不羣卓爾有立自
總戎二紀作莫兩藩崇名輝於廟堂茂績策於盟府處
股肱執政之寄服貂璫清道之榮行必求人動無任已
勝殘務理經遠詢謀不怙貴以專刑不矜能而肆志深
厚靡公侯之度剛明執忠孝之風威加敵國而愈謙化
被隣封而垂訓以百當千之銳卒勇且知方育幼與老
之編氓恭而好禮負戡難濟時之術蘊天寶神授之機
而設燎探微築臺請益詩盈鼓篋傳癖橫經比飯均羹
席上盡雕龍之客投醪散庫營中皆搏虎之人勁節貫
於雪霜至誠格於天地頃者浙人蟻市稱霸蛟雷振妖

爾則統仗順之師整爭先之旅馳勇敢永泮渠魁書
于鼎彛煥若縑素近則淮人作孽僉僧無君拒抗王師
邀截貢賦竊據州縣斷絕梯航先皇上賓之時不展號
弓之慕羣后咸秩之日莫申執幣之儀神人共憤其侵
陵華夏爭誅其干犯爾則痛主辱以疾首異師貞以適
志共粉巨盜之骨必堪元亮之額是用金璽昭德彤弓
報功示王澤之非濫表臣勲之益崇麟符出征驚冕專
祭慎爾修之克有終也今遣使臣中大夫上柱國王鉅
副使朝議郎裴筠冊爾為吳王於戲加王爵
之極號標封建之殊名往盡乃心永服徽命
冬十一月

乙丑湖州刺史高彥卒子澧嗣唐命王本道建三代私

廟閏十一月王命弟鏐為婺州制置使十二月王表薦

行軍司馬王景仁唐帝詔景仁領寧國軍節度使

舊唐書云

天祐三年十二月己卯朔詔淮南偽署宣歙觀察使檢校司徒王茂章可金紫光祿大夫檢校太保從錢鏐請也今從

是歲割睦州分水縣南新寧善新登廣陵銅峴等五鄉隸杭州臨安縣

天祐四年春三月唐勅升衣錦城為安國衣錦軍王遣王子傳瑋傳瓘討盧佶於溫州夏四月佶將水軍拒于青澳傳瓘曰佶精兵盡在此不可與戰乃自安固捨舟間道襲溫州戊午溫州潰斬佶而還王以都監使吳璋為溫州制置使命傳瑋等移兵討盧約于處州是月梁

王晃稱皇帝國號梁改元開平遣上金吾衛將軍石彥

辭刑部郎中薛昭序來宣諭五月盧約以處州降

中和元年

約據處州至是而亡

王以為浙江安撫副使命指揮使俞浩為處

州制置使是月梁遣金吾衛大將軍安崇隱進封王為

吳越王增食邑二千戶實封三百戶仍賜號啓聖匡運

同德功臣客有勸王拒命者王笑曰吾豈失為孫仲謀

邪遂受之鎮海節度判官羅隱亦勸王舉兵討梁王心

義之而不從六月梁遣中使來宣諭秋七月梁勅賜王

管內刺史並授官爵仍賜母妻封邑八月辛亥梁加王
兼淮南節度使楊州大都督充淮南四面招討制置使

一云充本道
招討制置使

九月梁封鎮東軍神祠為崇福侯從王請

也

吳越備史云梁封衣錦軍神祠號
崇福侯今從五代會要明集禮

勅曰鎮東軍墻隍

神龐玉前朝名將劇郡良材頃因剖竹之辰實有披榛
之績剏修府署綏輯吏民豈獨遺愛在人抑亦垂名終
古況錢鏐位隆三鎮功顯十臣能求福而不回致効靈
而必應願加懿號以表冥符宜旌岌業之功用顯優隆

之澤宜賜號崇福侯仍付所司

武肅王鎮東軍塙隍神廟記曰若夫冥陽共理

之規人神相贊之道傳於史冊今昔同符切以浙東地號奧區古之越國當舟車輻湊之會是江湖衝要之津自隋末移築子塙因遭公署據卧龍之高阜雄堞穹崇對鏡水之清波風煙爽朗緬惟深固宜叶冥扶故唐右衛將軍總管龐君諱玉頃握圭符首臨戎政披榛建府吐哺綏民仁施則冬日均和威肅則秋霜布冷堵塙愛戴黔庶詞謠尋而罷軍興嗟餘芳不泯衆情追仰共立嚴祠鎮都堞之岡幽宰軍民之禍福福殿堂隆遽儀衛精嚴式修如在之儀仰托儲靈之座往載繁生劉氏妖起羅平予躬稟睿謀恭行天討數年擐甲兩復越塙皆資盼昧之功以就戡平之業持為重增儀像嚴潔牲牢邇來四野無塵重門罷折丁卯歲揚旌東渡巡撫軍民躬奠椒漿目瞻靈像每暢吳風越俗共欲道泰人安昔為兩鎮之疆今作一家之慶遂馳牋表請降崇封所冀朝

恩與漢牧齊標美稱共恭密對策尋蒙天澤果賜允俞
頌崇福立嘉名昇五等之尊爵其所奉勅命具列如左
嗚呼人惟神祐神實人依爰自始建金湯肅陳祠宇莫
茲中壘三百年來雖享非馨未登列爵今則值予佐國
連統藩維啓吳越之雙封為東南之盟主況遇金星應
蘇梁德克昌道既泰於君臣澤遂加于幽顯獲申奏薦
遽降徽章今則象軸煥新龍綸遠至表勲名於萬代昭
靈感於千秋固當永荷皇私長垂幽贊保我藩宣之地
遐清災沴之源共泰斯民永安吾土烜矣赫矣永作輝
華今當吳越雙封一王理事亦仗土地陰陽冥力護持
神既助今日之光榮予亦報幽靈之煥耀但慮炎涼改
易呈歲組還不記修崇莫源事始聊刊貞珉以示後來
時大梁開平二年歲在戊辰 屬月啓聖匡運同德功臣
淮南鎮海鎮東等軍節度使檢校太師守侍中兼中書
令吳越王 冬十月梁授王子傳瓘金紫光祿大夫十二

錢鈐記

冬十月梁授王子傳瓘金紫光祿大夫十二

月江西危全諷為淮南所敗信州危仔倡乞師于我是

歲建千頃院築温州子城周三里十五步

唐會要載是年太常禮院

奏兩浙節度使錢鏐受冊訖立門戟一十二枝合準禮例更添四枝仍五年一易從之



十國春秋卷七十七



總校官庶吉士臣張能照

校對官檢討臣王鍾健

謄錄貢生臣李敬敏

欽定四庫全書薈要

史部

十國春秋卷七十八

詳校官員外郎臣楊世綸



十國春秋卷七十八

檢討吳任臣撰

吳越二

武肅王世家下

開寶元年春正月遣兵攻淮南甘露鎮以救信州梁勅

改臨安縣為安國縣廣義鄉為衣錦鄉

按舊五代史梁開平二年改臨

安縣廣義鄉為衣錦鄉猶冠以臨安者縣名與鄉名同時改也

夏六月梁授王檢校太

師守中書令增食邑一千戶實封一百戶秋八月梁勅

改唐山縣為吳昌縣

歐陽志興地
廣記作金昌

唐興縣為天台縣

順存

錄云開平三年改唐興
為新興今從吳越備史

又勅升杭越等州為大都督府

王遣寧國節度使王景仁奉表詣大梁陳取淮南之策
梁主問進奏吏曰錢王平生有所好乎吏曰好玉帶名
馬梁主笑曰真英雄也乃以玉帶一匣打毬御馬十匹
賜王是月復改新城縣曰新登長城縣曰長興樂成縣
曰樂清避梁諱也九月梁授鎮東軍節度副使成及為
保大軍節度使同平章事副使餘如故淮南將周本呂

師造攻蘇州王命從弟鋸討之是月張仁保襲取常州之東洲淮南以陳璋為水陸行營都招討使率柴再用等將兵來救仁保敗績于魚蕩復失東洲梁封故隋司徒陳仁果為福順王

仁果常以陰兵助王王崇報之請封于梁且令諸州皆立廟祭京京

南龔廟記作福順賢德王他書又作福順武德王

王改吳山紫極宮為真聖觀

一云乾符中建真聖觀王改兩浙老君廟

是歲王以中原喪亂改元天寶私

行于境中既而復通中國或諱而不稱

天寶二年夏四月梁授王守太保增食邑二千戶實封

二百戶是月淮南兵圍蘇州守將孫琰拒之甚力王命

弟牙內指揮使鏐

五代史云遣其弟鏐鏐救之

行軍副使杜建徽江

海遊奕都虞候何達司馬福等率師救姑蘇內外夾攻

生擒淮南將何朗閭丘直等凡三千餘人獲兵甲生口

三十萬戰船二百餘艘周本呂師造等夜遁又追敗于

皇天蕩五月甲寅王親巡蘇州遣其將梅世忠李開山

屯兵于許浦之上游封故唐曹王明為昭靈侯

明為唐太宗子

淮人圍姑蘇時守將禱于是月丁巳明州刺史黃晟卒其廟輒自潰去故加封焉

辛酉王自蘇州復如東府辛巳巡明州因城望海鎮

一作

定海鎮

命子

闕

珎為明州制置使信州危仔倡為其下應

淮人而叛遂奔於我王以為淮南節度副使更其姓曰

元氏六月壬寅王發明州梁遣刑部尚書姚洎

錢氏家乘作洎

禮部員外郎羅衮授王吳越王冊禮

冊文曰皇帝若曰迺者有唐告終王

政日奈婦寺亂常于內

闕犯順于

闕列鎮張膽而相

攻大臣捫心而無措惟思家族遑恤朝廷朕起自兵戎

歷階節度憂皇天之不弔閔黎庶之倒懸誓眾興師為

民靖命東征西怨共後我后來蘇草食壺漿咸若厥角

墜地竟以數州之力大剪諸國之鋒歷試諸艱遂叨九

錫稽舜禹之禪法隋唐之教天步未艱人情習亂因商

民之思紂族桀犬以吠堯職具不共何所不至咨爾上
柱國吳越王錢鏐山川毓秀二五儲精以不世出之才
行大有為之主納交伯府翼戴中朝靖淮甸之邪氣不
得奈我王氣斬羅平之妖鳥不得鳴我王郊迨乎受禪
之初首遣宣諭之使頗知天命不效狂謀匪無二國之
封曷獎尊王之義今遣使金紫光祿大夫尚書上柱國
姚坦使副尚書禮部主客員外羅衮持節備禮胙土分
茅冊爾為吳越關王嗚呼車徒萬乘何闕之不可磨
節制三方何強梁之不可伏矧百粵及后駐蹕之地三
吳秦伯肇封之疆勾踐用之以親周夫差因之而駕晉
方賴率三軍而捷荆楚糾列國以平淮戎亢為東海屏
藩永保中原重鎮毋姑息以敗事毋誇大以墮功欽哉
其聽朕命戊申王至自東府是役也王行次餘姚丈亭鎮舟

湊巨石不能進既而大雨震電有二龍負王舟鎮過使

翁元軻拽舟而進二龍自舡升焉秋閏八月梁授王守

太尉加實封二百戶制曰集非常之事必有挺非常之

才建第一之功必有居第一之位朕膺圖受命負宸開

階未常以真大尉之官輕於擬議大司關之職易於簡

求蓋由其爵尊其任重不有英佐孰當異恩啟聖匡運

同德功臣淮南鎮海鎮東等軍節度使淮南浙江東西

等道管内觀察處置充淮南四面都統營田安撫兼兩

浙鹽鐵制置發運等使開府儀同三司檢校太師兼中

書令杭越等州大都督府長史上柱國吳越王食邑一

萬五千戶實封一千戶錢鏐海岳騰英星雲誕秀契君

臣咸一之德有文武兼備之才宣慈惠和忠正廉毅敦

詩說禮樹百行於藩籬去暴除奸敵萬人於帷幄弼予

興運明乃嘉謨頃屬淮彛不賓王化自爾益封吳會兼

鎮廣陵追擒每盡于隻輪覆溺連收其巨艦復聞奸宄

屢擾巡封謂天蓋高若水可恃爾又橫戈憤悻獨力支

吾妙運神機大殲戎醜玄雲陣起雄風驅下瀨之師白

露圍開沴氣散常州之化再安生聚重復土疆薛公之
三刺咸明漢主之一奇斯在况早攀鱗翼備見肺腸同
德同心二紀密叅於締構惟忠惟孝四方咸則於儀刑
苟非劇恩何以加賞是用鑲于彝鼎冊以輅車擬呂望
之尊崇正列侯之貴重仍加真食復寵兼官式是獎酌
且旌忠烈於戲進以正大易所以經邦慎厥終格言用
之居位勉思遵守克荷寵靈服予訓辭錫爾繁祉可守
太尉加實封二百戶餘並如故是月梁勅置蘇州吳江

縣明州靜安縣

一作望海縣
又改定海縣

從王請也冬十月湖州刺

史高禮貳于我遣其黨焚義和臨平等鎮王命弟鏢帥

師討之十一月乙酉發運使羅隱卒以蔣渙為温州刺

史

繼渙者為
李廣琛

是歲術者言安吉縣東有王氣王命鑿其

地忽四鵠飛出化為四龍賜名曰四龍湖命建雙仁祠

祀唐顏真卿以從父兄杲卿並饗王幸海鹽金粟寺令

寺僧設衆施茶

天寶三年春二月湖州刺史高禮導吳將李簡陳璋等

入其境都將盛師友沈行思閉城不納王遣子傳璚濟
師禦之吳人挾澧而遁三月癸巳王巡湖州命弟鏐為
刺史癸卯至自湖州五月奏改西府富陽縣為富春縣
東府暨陽縣為闕縣處州松陽縣為長松縣婺州浦

陽縣為浦江縣惡楊氏也

歐陽忞輿地廣記云朱梁時楊氏據江淮於是吳越錢氏

上言以淮寇未平耻聞逆姓請改松陽為長松

又割湖州武康縣隸杭州秋七

月王表監軍宦者周廷詰已下二十五人於梁言其非

劉韓之黨乞原之

通鑑開平四年吳越王鏐表宦者周廷詰等二十五人唐末避禍於此非

劉韓之黨上曰此屬吾知其無罪但今革弊之初不欲置之禁掖可且留於彼諭以此意今從吳越備史廷詰作廷詰八月始築捍海石塘塘外植滉柱十餘行以折水

勢先是江濤洶湧板築不時就王于疊雪樓架強弩五百以射潮既而濤頭趨西陵潮為頓歛遂定其基以鐵

絙貫幢榦用石礎之而塘成

昭勲錄云王築捍海塘怒潮急湍版築不就乃採山

陽之竹法天人造為箭三千隻羽以鴻鷺之羽飾以丹朱鍊剛火之鐵為鏃命強弩五百人以射濤頭人用六隻每潮一至射以一隻射及五隻潮乃退東趨西陵餘箭埋於候潮通江門濱鎮以鐵幢誓云鐵壞此箭出又以大竹破之為籠長數十丈中實巨石取羅山大木長數丈植之橫為塘依匠人為防之制又以木立於水際

去岸二九尺立九木作六重象易既未濟卦由是潮不能攻沙土漸漬岸益固也一統志云吳越王箭所射止處甯立鐵幢因名鐵幢浦臨安志云初立幢時塘猶未成慮潮盪幢用鐵輪護其址而以鐵絙貫幢榦且引絙維于塘上下之石礎然後實土築塘故幢首出此說為近之○贊寧傳載畧云先是江心有石即秦望山脚橫截波濤中呼為羅刹石我國八月既望迎潮設祭必動樂鼓舞其上尋命呼鎮江石開平辛未漸平沙漲遂作木闌圍頂今祭江亭是也○武林梵志曰武肅王築塘時致禱于胥山祠仍為詩一章其末句曰為報龍王及水府錢江借取築錢城函鑰置海門山既而潮水避錢塘東擊西陵云

建侯潮通江等城

門又置龍山浙江兩閘以遏江潮入河冬十月戊寅王親巡衣錦軍有鄰媪年九十餘攜壺漿迎王曰錢婆留

寧馨富貴王下車拜之王置酒高會父老男婦八十歲
以上者金尊百歲者玉尊王執爵上壽製還鄉歌曰三
節還鄉兮掛錦衣碧天朗朗兮愛日暉功臣道上兮列
旌旗父老遠來兮相追隨家山鄉眷兮會時稀今朝設
宴兮觥散飛斗牛無孑兮民無欺吳越一王兮駟馬歸
時父老不能解王復高揭吳音為歌舉坐賡之叫笑振
席丙戌王至自衣錦城湖州巡校將沈行思以罪伏誅
命湖州都將盛師友權婺州刺史是歲廣杭州城大脩

臺館築子城南曰通越門北曰雙門

按隋開皇九年建杭州府治于鳳凰

山柳蒲西唐因之吳越國治即在此後宋高宗以為行宮

錢塘富庶由是盛于東南

有何人夜署府門曰沒了期沒了期修城財了又開池
王出見之命易其句云沒了期沒了期春衣財罷又冬
衣士卒嗟怨者遽息是年梁追封王曾祖宣州旌德縣
令吏部尚書左僕射沛為洪勝王

錢氏家乘云沛字子霧父碩璽于朱梁時

贈尚書檢校司空娶陳氏子三曰湛曰混曰沛沛年七十八卒唐以武肅功贈禮部郎中加諫議大夫梁追贈尚書左僕射謚弘聖

曾祖妣童氏為齊國太夫人

錢氏家乘

云沛娶東苑童氏贈趙國太夫祖太尉宙為建初王錢氏

家乘云宙字遵古喜讀揚子太元卜筮于鏡山寢疾時武肅已鵠起侍醫藥不脫帶竟終于錦軍城唐贈太尉

卿加太尉同中書門下平章祖妣楚國太夫人水丘氏事梁追謚建初王子一曰寬

為晉國九華太夫人考威勝軍節度推官職方郎中太

府少卿禮部尚書開府儀同三司守太師中書令寬為

英顯王錢氏家乘作開平四年妣秦國太夫人水丘氏

為趙國太玄太夫人錢氏家乘作乾化四年敕建三世祖

廟于安國衣錦軍

天寶四年春正月丙戌日有食之夏四月梁制命王守
尚書令兼淮南宣歙等道四面行營都統增食邑二千
戶實封一百戶又遣刑部侍郎李光嗣建王生祠于衣
錦軍仍勅翰林學士李琪為碑文從僚吏將校請也五
月朔梁改元乾化是月築松江南北二城鎖柵畢備秋
七月梁勅命淮南兩浙幕府將吏五百人並賜贊政安
國功臣冬十月辛亥朔湖州刺史王弟鏐擅殺防
戍指揮使潘良一作長推官鍾安德遂奔吳是歲仁王廢

院掘地得大錢王以為瑞應命建大錢寺于其地設寶幢二又捨安國縣宅基為寺請額于梁曰光孝明因

天寶五年夏六月梁主遇弒郢王友珪僭位秋七月友珪遣刑部尚書李皎冊尊王尚父八月己丑城西陵是時改蘇州虎陂曰許墅避王名也國人謂石榴為金櫻留住為駐下改劉氏曰金氏留氏曰田氏

天寶六年春正月梁友珪改元鳳曆肆赦二月梁均王友貞舉兵誅友珪遂即位于汴京更名瑱復稱乾化勅

遣供奉官楊彥賓來宣諭三月梁授王尚父冊禮是月
吳行營招討使李濤率兵二萬自千秋嶺寇我衣錦軍
王命子湖州刺史傳瓘為北面應援使救之又命子睦
州刺史傳瑋為招討收復都指揮使攻東洲以分其勢
夏四月傳瓘伐木以斷吳兵遂擊之生擒李濤等八千
餘人傳瑋獲敵將李師愈姚延環等三千餘人而還是
月梁增王食邑三千戶實封二百戶五月吳宣州刺史
花虔會廣德鎮遏使渦信將復寇衣錦軍王子傳瓘將

兵討之六月師克廣德縣獲虔信及吏卒七千餘人以
歸辛卯彰義軍節度使檢校太尉兼侍中成及卒秋九
月王遣子傳瓘傳璠傳瑛攻吳常州營於潘封吳將徐
溫帥兵赴之與別將陳祐夾擊我軍傳瓘等大敗冬十
月梁加王子傳瓘開國爵邑乙酉大同軍節度使駙馬
都尉王子傳瑛卒王命子傳璠權蘇州刺史加封安國
縣神濟安侯為永定王

先是乾顯二年王奏乞追封
臨安晉虞府君為濟安侯

是

時築城屯戍于德清之憾山號曰奉國城又遣兵戍烏

程之東九十里曰烏戌

即烏鎮城見鄭
蟠吳興鏡見錄

天寶七年夏六月梁授王子傳瓘開國侯食邑七月清
海軍節度使劉巖遣供軍巡官陳用拙奉禮幣請兄事
于王王納之是歲改温州橫陽縣曰平陽表封錢塘龍
君為廣潤龍王

累封靈淵
博濟侯

天寶八年春正月梁授王子傳瓘以下官爵有差甲午
王親巡衣錦軍二月梁遣給事中韋彖金部郎中李發
選王子傳珍為駙馬都尉閏二月己亥王至自衣錦軍

冬十一月乙丑梁改元貞明

吳越傳史云壬辰朔改元大赦今從薛氏舊五代史

是時置都水營使以主水事募卒為都號曰撩淺軍亦

謂之撩清命于太湖旁置撩清卒四部凡七八千人常

為田事治河築堤一路徑下吳淞江一路自急水港下

殿山湖入海居民旱則運水種田澇則引水出田又開

東府南湖

即鑑湖

立法甚備

元知水人潘應武云錢王時于太湖旁置撩淺軍四部。

曾鞏開鑑湖說云南湖歷錢王鏐父子立法甚詳

天寶九年春正月梁授浙東營田副使常州刺史杜建

徽為涇源節度使夏五月遣浙西安撫判官皮光業自
建汀虔郴潭岳荆南道入貢于梁秋七月梁加王諸道
兵馬元帥梁臣多言王入貢利于市易不宜假以名器
翰林學士竇夢徵至執麻而泣坐貶蓬萊尉冬十二月
建浮圖于城南是歲王命子牙內先鋒都指揮使傳珣
逆婦于閩自是與閩通好錢塘縣節度討擊副使方鉢
造石幢于福慶庵鉢同衆共造石幢一具鐫大佛頂尊
勝陀羅尼咒於上其受畧曰布金設
像寶刹交輝土淨
墨生宛如佛國是時婺州道士周某獻赤松澗仙米

于王王密遣張思敏按所產之地賜以紫衣金帛

米故
仙種

止五十區穗重香濃鼠則野
狐為之驅鳥則蒼鷹為之逐

天寶十年春三月梁勅授王子贊正安國功臣鎮海軍
北面水陸都指揮使金紫光祿大夫檢校太保守湖州
刺史大彭郡侯食邑一千戶傳璫贊正安國功臣鎮海
軍節度副使土客諸軍都指揮使金紫光祿大夫檢校
太保大彭縣開國侯食邑一千戶傳球贊正安國功臣
鎮東軍東面水陸安撫都指揮使光祿大夫檢校太保

守温州刺史大彭縣男食邑三百戶傳璲贊正安國功
臣鎮東軍西面安撫都指揮使光祿大夫檢校太保守
睦州刺史大彭縣男食邑三百戶傳懿贊正安國功臣
鎮東軍親從都指揮兼土客諸軍安撫副指揮使銀青
光祿大夫檢校司徒守賓州刺史傳瓘贊正安國功臣
鎮海軍上右廳都指揮使兼土客諸軍安撫副指揮使
金紫光祿大夫檢校司徒前闕州刺史闕球贊正安國
功臣衣錦軍防遏都指揮使金紫光祿大夫檢校司空

守義州刺史傳琇贊正安國功臣鎮海軍牙內先鋒指
揮使金紫光祿大夫檢校司空守峰州刺史傳珣贊正
安國功臣鎮海軍節度上押衙充安國衣錦軍親從副
指揮使兼兩直都虞候金紫光祿大夫檢校尚書右僕
射守密州刺史傳琰贊正安國功臣鎮海軍節度右押
衙充上直都知兵馬使銀青光祿大夫檢校尚書左僕
射傳璠等各授官秩階爵及遥郡有差

按吳越備史總
云十一人今史

載止十人
未敢妄增

夏四月梁詔諸道兵馬元帥府開幕除吏一

同天策上將軍府故事是月復以峰州刺史傳珣守檢校太保餘如故冬十月己亥梁遣吏部尚書李燕中書舍人韋說加王天下兵馬都元帥先是梁使至拜謁甚恭說獨長揖不拜是月黃龍見於卞山之金井洞命立

瑞應宮

一作祚應宮

是歲王建崇善王廟于蓬萊閣之西

故

龍山神祠也

浦江人何千齡四代同居有司上其事

天寶十一年春三月朔四星聚斗王開元帥府置官屬梁授兩浙行軍司馬秦州節度使平章事馬綽守檢校

太尉同平章事餘如故秋七月吳招討使劉信攻虔州

譚全播乞師于我王遣子統軍使傳球為西南面行營

應援使帥鮑君福等將兵攻信州以救虔州君福斬吳

將李師造

或云當作呂師造按鄱陽開福院有武義二年銅鐘安國寺有順義三年鐘皆勒呂師造

官階則呂師造不應先死也李師造疑別是一人或謠傳年月未可知也擒偏將馮敏等

吳越

俗史作馮一

一千餘人至城下刺史周本張虛幕于門內召

僚佐登樓作樂宴飲我兵疑有伏遂解圍八月吳以前

舒州刺史陳璋將兵侵蘇湖是月傳球自信州南屯汀

州時吳師大破楚兵復遣梁詮擊我兵傳球引還梁授
涇源節度使杜建徽守檢校太傅同平章事冬十一月
吳圍虔州刺史盧光雋來告王命徵兵援之未及境而
虔州滅貢道遂絕始由海道出登萊入貢京師是月後
百濟王甄萱遣使進馬王報聘授萱中大夫餘如故是
時立晉分水令朱徹廟于新登縣封徹通靈侯

天寶十二年春三月梁詔王大舉兵伐吳王以子節度
副大使傳瓘為諸軍都指使帥戰艦五百艘自東洲擊

吳夏四月與吳人戰于狼山江大敗吳兵斬其百勝軍

使彭彥章生獲士卒千餘人梁以湖州刺史大彭開國

子王子傳璟為宣州寧國軍節度使同平章事六月吳

人敗我兵于沙山秋七月王遣子傳瓘將兵三萬攻常

州吳徐溫來拒我師命陳璋以水軍下海門出我後壬

申戰于無錫指揮使何逢吳建死焉遂班師王見逢所

乘馬悲不自勝將士以此心附之八月吳歸無錫之俘

遣客省使歐陽汀來請通好王納之息民故也自是休

兵二十餘年吳王及徐溫屢遺書勸王建國王不從九月梁以南海僭號詔我師伐之王雖受命而山川隔越請以事寢冬十一月丁亥吳越國正德夫人吳氏薨是時封安國縣獨山神為鎮水山王

天寶十三年春二月梁授宣州節度使同平章事王子傳璟以下並起復雲麾將軍上右金吾衛大將軍員置同正員餘如故三月王命元帥府判官皮光業使于吳秋七月王以子睦州刺史傳懿為婺州刺史冬十一月

王遣使為其子傳璠

通鑑作璠
今從備史

求昏于楚楚王殷許之

天寶十四年春三月吳遣王從弟龍武統軍鎰歸王以
鎰為鎮海軍節度副使王亦歸李濤以報之夏五月梁
改元龍德六月乙卯朔日有食之秋七月楚遣掌書記
李崑馬匡送女歸于都知兵馬使檢校尚書左僕射王
子傳璠冬十月梁授王子傳瓘檢校太傅同中書門下
平章事充清海軍節度使自是賜王書詔不名是歲建
上方多福院又建天真院于天真山後舊名登雲臺亦

名拜郊臺

蓋郊天之所

天寶十五年春正月梁授王子傳瓘以下並起復加爵邑有差秋七月王建天下元帥府于國門之右八月兩浙行軍司馬秦州雄武軍節度使同平章事馬緝卒冬

闕

月王晝寢夢青衣人捧簿書以前告曰大王明年錢塘官滿及寤頗惡之是歲割錢塘鹽官各半及富春之

長壽安吉二鄉置錢江縣

後忠懿王納土改錢江為仁和公司杭州府志云錢江縣治

在今武林門內梅家橋南

天寶十六年春二月梁遣兵部侍郎崔協一作刑部員

曄

外郎夏侯昭冊封王為吳越國王丁卯王始建國

按武原志

載朱行先墓誌銘題曰義忠國是吳越建國亦稱為義忠國矣儀衛名稱多如天子之

制謂所居曰宮殿府署曰朝廷教令下統內曰制敕將

吏皆稱表疏稱吳越國而不言軍以子清海軍節度使

兼侍中傳瓘為鎮海鎮東留侯總軍府事置百官有丞

相侍郎郎中員外郎客省等使夏四月乙巳晉王即皇

帝位國號唐改元同光是月梁亡乾寧中有耕者得傳

國璽以獻于王王謂非人臣家所宜畜至是獻焉五月

唐遣宣諭使通事舍人吳韜走馬自淮甸至賜王名馬

玉帶香藥冬十月辛未朔日有食之六月我國文士朴

巖由新羅投高麗

東國通鑑云新羅景明王七年吳越國文士朴巖投高麗○案巖降高麗

為春部少卿是年使于唐

十二月王以行軍司馬杜建徽為左丞相

是時畜馬三萬餘匹號曰海馬

後人名其地為西馬廐

建閱禮堂

于宮中

寶大元年春二月癸卯金吾衛大將軍置同正員檢校

司空明州刺史王子傳瓘卒秋九月王遣使錢詢貢唐
方物銀器越綾吳綾及龍鳳衣絲鞵屐子又進萬壽節
金器盤龍鳳錦織成紅羅縠袍襖衫段祕色甌器銀裝
花櫛木厨子金排方盤龍帶御衣白龍瑤紅地龍鳳錦
被紅藤龍鳳箱等王既厚貢獻復賂唐權要求金印玉
冊賜詔不名稱國王有司言故事惟天子用玉冊又非
四裔無封國王者唐主皆曲從王意冬十月唐授王依
前天下兵馬都元帥尚父尚書令吳越國王授王子傳

瑾檢校太師兼中書令充兩浙節度觀察留後十一月

陞蘇州為中吳軍領常潤等州

薛史錢鏐傳云鏐恃宗盛分兩浙為數鎮其節

制署而後奏○又薛史曰唐莊宗三年升蘇州為中吳軍今從吳越傳史

是月唐授鎮東軍

節度檢校太保兼中書令大彭郡侯王子傳瓌充中吳

軍節度使是歲王於嘉興置開元府割華亭海鹽二縣

屬焉移安國縣法華院于縣東北隅

以鍾尚書府地建立

開慈雲

嶺西關城宇

寶大二年夏四月癸酉朔日有食之五月王獻二孔雀

于唐又遣使王浩貢重午簞扇龍鳳紗紋厨有差秋八月唐命吏部侍郎李德休等賜王黃金印玉冊仍錫紅袍御服一副及沿身禮物衣冠劍等其印文曰吳越國王之印冊曰維同光三年歲次乙酉八月辛酉朔二十七日丁亥皇帝若曰王者惠濟黎元輯寧方夏重名器任股肱忠而能力則禮崇賞不失勞則人勸所以啟周公之土宇列漢祖之膏腴者錄彼茂勲寘之異數登進賢哲焜耀事功也天下兵馬都元帥尚父守尚書令吳

越國王錢鏐朝海靈源承天峻岳以英風彰德望以勇氣贊忠貞徃因義舉之徒盛推韜畧遂著襲封之績高步藩維挺魚鯢鳥鳳之姿擁岼虎水龍之衆居方面任將五十年宣導休聲攘除兇醜摧堅奮銳鄙許東固圉之謀阜俗頌條廣冀北安居之頌環塹浙江之要雲滋星紀之墟閱禮敦詩位崇元帥前茅後勁名重中權守畫一之規奉在三之節信立靡移於風雨義行曷倦於津塗効珍則那顧險難薦幣則常歸宰府振英謨而端

右弼鍾懿號而異列藩可謂職貢不乏梯航時至翼戴
天子加之以恭也載念尊獎爰示徽章今遣正議大夫
守尚書吏部侍郎上柱國贊皇縣開國男食邑三百戶
賜紫金魚袋李德休使副朝議郎守起居郎充史館修
撰賜緋魚袋聶瑒持節備禮胙土苴茅冊爾為吳越國
王於戲地畫數圻賦過千乘墨守闔閭之境軌圍句踐
之封子弟量才序進多分于榮戟土疆漸海方輸豈限
于魚鹽貴盛富強雖古之封建諸侯禮優夾輔不加于

此慎厥始終無以位期驕無以欲敗度欽承賜履協予

一人汝嘉是時冊禮既備左右猶具竹冊銅印唐主曰

尚父元老不當待以人臣況已封建乎因特加殊禮五代

會要同光三年六月太常禮院奏吳越國王錢鏐將行冊命按禮文合用竹簡勅宜令有司修製玉冊俾稱元勳議者以玉冊帝王所用不合假令人臣蓋當樞密院承旨段佖受錢鏐之賂曲隨其請樞密使郭崇韜不詳典禮故也○段佖是月王起玉冊金券詔書三樓於衣錦

田歐史作段佖

軍遣使冊新羅渤海王海中諸國皆封其君長冬十月

鎮海鎮東留後王子傳瓘中吳軍節度使王子傳瑒各

貢唐綿綺千件及九經書史四百二十三卷又貢佛頭螺子青一山螺子青十婆薩石蠅子四空青四十一月唐授土客諸軍都指揮檢校太保兼鎮海軍節度副使王子傳球守檢校太尉兼侍中充靜海軍節度使閏十二月王遣沈瑫以受玉冊封吳越國王告于吳吳以其國名與已同不受書仍戒境上無得通我使者及商旅是時建上清宮于秦望山有巨石二十餘株自然成行名曰金洞門

寶正

甲子會紀
作寶貞誤

元年夏四月王有疾如衣錦軍命子傳

瓘監國吳徐溫遣使問疾左右勸王弗見王曰溫名問
疾實覘我也強出見之溫果聚兵欲襲我聞王疾瘳而
止丙午唐主嗣源即位甲寅改元天成秋七月庚寅王
至自衣錦軍九月唐加王子傳瓘食邑一千戶實封一
百戶又授中吳軍節度使王子傳璟開府儀同三司加
食邑五百戶冬十二月唐授靜海軍節度使王子傳球
開府儀同三司食邑五百戶是歲大水中吳軍尤甚水

中生米大如豆民取食之

寶正二年春正月唐主更名亶冬十一月遣尚書班

闕

為通和使如高麗及後百濟甄萱時萱與高麗王構兵

也

東國通鑑新羅景哀王紀載甄萱三十六年是為高麗太祖十年冬十二月萱貽書于高麗求和曰前月

七日吳越國使班尚書至傳王詔旨云云明年春正月高麗王咨萱書曰伏奉吳越國通和使班尚書所傳詔書一道無蒙足下辱示長書叙事者云云

是歲徑山僧景文望南山有佳氣

結廬山巔大理評事俞壽因捨山為寺發土得金銅佛

像三座名曰寶林院王建惠因寺于玉岑山北是時浚

柘湖及新涇塘由小官浦入海又以錢塘湖葑草蔓合
置撩兵千人芟草濬泉

寶正三年春二月朔日有食之唐遣監門衛上將軍烏

昭遇賜王湯藥國信

宋通鑑作供奉官烏昭遇蓋監門
衛上將軍特借官耳今姑從十國

紀年吳越
備史之文

夏六月大旱有蝗蔽日而飛晝為之黑庭戶

衣帳悉充塞王親祀于都會堂是夕大風蝗墮浙江而

死

葆光錄云寶正中當秋成一旦蝗翦日而
堽武肅王虔祝畢投于浙江不可勝紀

秋八月王

欲立中子傳瓘為後顧諸子各言爾功功多者即立王

子傳懿傳璟傳瓘皆盛推傳瓘乃奏唐請以兩鎮授傳
瓘閏月唐詔傳瓘為鎮海鎮東兩軍節度使王使表韜
進唐白金五千兩茶二萬七千斤謝恩是月王命浚上
虞縣舜井得識記寶物及重華石等

先是旌教寺僧義思奏云按圖經西

北去三十五里有舜井二口深三丈舜子生時井為湧
泉即淘金之處也世傳秦始皇封塞今作兩墩存焉各
高一丈相去三十餘丈晉宋以來僧為佛寺鄉人或遇
耕鋤多得古博覽石南去半里有舜廟北去半里為百
官橋東去二百步有機證院唐僖宗朝賜額寶正三年
閏八月初九日奏上當月十四日王差西都上直官五
十人東都上直官五十人貴大糧倉鍾至井所開掘得
識記寶物一百二十餘件都抽領西都上直廂虞候盛

瑗都上直廂虞侯孫宏西都隨身虞侯閻丘稔勾當科
祭內直殿十將于軒十六日鑿西井十九日得銀環六
赤珠一金合一古文錢二千三百四十琥珀珠一當十
大錢三當五十大錢二十四太平百錢直百三銖二十
四大錢二百五十四五銖錢九百六十貨泉錢二百八
十半兩錢三十石獅子一鎬其背曰重華井天明可開
腹內有水晶珠一東井得銀塔一高一尺五層內有金
瓶舍利二顆散金瓶二金鈴六銅鈴一銀環六銀鈴一
水精珠十四琥珀珠九雜珠大小三十五小琥珀獅子
三十瑪瑙珠七玉人一玉環一銅鏡三銅爐一小瑪瑙
珠六玉瓶一以上共三十四件並有石匣盛之題云唐
元徽四年於此造塔鎮井西有重華石一片濶三尺厚
九寸左右有索痕深二寸宮中令造深沙神一軀足履
四石寶正四年六月廿九日差錢文殷祭神鎬云吳越
國王寶正三年八月十九日重開舜井收得重華石一
片切恐年移代遠莫測端由特令鎬刻用記年月已丑

歲林鍾之月二十九日
天下都元帥吳越王記

寶正四年春二月唐授王子傳瓘杭越等州大都督長
史增食邑實封中吳軍節度使王子傳璫增食邑五百
戶實封一百戶靜海軍節度使王子傳球兼中書令餘
如故秋七月台州大水請軍儲三十萬斛八月唐賜烏
昭遇自盡先是昭遇之來使也與供奉官韓玟有隙昭
遇每以國事私于我見王輒拜舞稱臣謂王為殿下使
還玟具述其事又王常寓書樞密使安重誨云吳越王

致書于某官執事辭甚倨嫚而重誨復多要求不克心
銜之至是奏昭遇失使臣之禮遂有是命因誣王大不

敬

五代史安重誨傳云重誨遣其嬖吏韓致副供奉官
烏昭遇使於鏐而攻恃重誨勢數凌辱昭遇因醉使

酒以馬莖擊之鏐欲奏其事昭遇以為辱國固止之及
攻還返諧於重誨曰昭遇見鏐舞蹈稱臣而以朝廷私
事告鏐昭遇生九月癸巳唐主詔王以太師致仕自餘王
死御史獄

爵尚父皆削之凡進奏官使者及綱吏令所在繫治王
令子傳瓘上表訟冤不省是歲所在地震居人有壞廬

舍者建天王院于東府

本董昌生祠
王因夢建焉

寶正五年春二月唐改元長興夏六月朔日有食之冬

十月王因唐冊閩王使者裴羽還

先是唐吏部郎中裴羽右散騎常侍陸崇

使于閩為海風所颺至錢塘王與安重誨有隙唐方絕王朝貢羽等遂被留經歲而崇以疾卒至是羽還求載

崇尸與俱歸王初不許羽以語感動王王惻然許之

附表引咎王子傳瓘等復遣

人以絹表間道自陳癸卯唐敕聽兩浙綱吏自便是歲

改台州樂安縣曰永安

寶正六年春三月唐遣監門衛上將軍張錢兵部郎中

盧重賜王國信湯藥起王致仕復元帥尚書令國王如

故依前不名仍示安重誨矯誣之罪敕曰天下兵馬都
元帥尚父尚書令吳越國王錢鏐久列王公恒輸愛戴
朕方禮加元老恩遇遠方安重誨擬綴瑕疵遽行阻絕
使錢傳瓘拜闕上章傾懷請罪言皆激切事且憑虛情
不可恕罪不可逭今已誅之以雪其寃故告

五代會要
長興二年

四月詔曰周崇呂望有尚父之榮漢重蕭何有不名之
禮錢鏐冠公侯之位疏吳越之封宜示異恩俾當等禮
其錢鏐宜秋七月有象入信安境王命兵士取之圈而
賜不名

育焉冬十一月重修防風山靈德王廟成王勅撰廟記

記曰蓋聞天地氤氲序寒暑而滋品彙生靈胎靈司土
地而福生民神祇理在于相須顯晦期臻于感契雖先
聖著難明之說而禮經垂嚴祀之文爰自五運相仍百
王理化或以勞定國或盡力勤王或利濟及于蒸民或
勲烈光于史策並皆立嚴祠于境土享廟食于春秋而
況江浙古區魚鹽興壤厯家則區分牛斗封維乃表裏
江山昔年霸越強吳今日雙封列國曠代之靈蹤不少
前賢之廟貌實多寡人自定亂平祆勤王佐命五十年
撫綏軍庶數千里開泰土疆四朝疊受冊封九帝拱扶
宗社改家為國興霸江南一方偃息兵戈四境組安耕
織上荷玄穹眷佑次翳神理護持統內凡有往帝前王
忠臣義士遺祠列像古跡靈壇悉皆褒崇重峻于深嚴
祀典常精于壘紫龔承靈親同保軍民其有風山靈德
王廟本係屬城近歸畿甸考諸舊記卽是武康縣風山
又按史記云汪罔氏之君守封禺之山今在吳興武康
縣指立廟之初則年華渺邈詳圖牒之說則詞理異同

唯有元和年再構唐極見存碑記彼既已具敘述此固
不復殫論聊書封置之錄直述旌崇之意丙戌年春寡
人以王母疊膺于祀典清宮樂展于嚴裡遂輟萬幾暫
歸錦里尋屬節當炎暑猶未却回閱

陸仁璋佐國

心懸危從

徧祝靈祇以風山靈德正昔年因舉兵師曾陳禱祝無
虧響應顯有感動遂懇惓告虔許崇堂殿洎清秋却歸
閱披觀閱陳既忠誠感動神明行褒贈先酬靈貺次
乃親分指畫委仗腹心按山川展拓基垆順岡阜增添
塹塹形勝並皆換舊規模一概從新居中而殿宇崇嚴
四面而軒廊顯敞周迴戶牖梵砌堦墀構之以杞梓櫨
楠飾之以玄黃丹漆外則浚川源之澄澈內則添竹樹
之青蒼至于廣廈神儀崇軒侍衛車輿僕從帳幄簾櫳
鼎鼐庖廚遠登器皿請福祈恩之所獻牲納幣之筵並
極鮮華事無不備丙戌年八月二十四日起首至是十
一月畢功土木皆是精新裡祀嘗嚴豐潔仍展牲牢蕭

鼓慶樂迎神耀威靈而萬古傳芳標懿號而千秋不朽
一則酬忠臣之啟願二則答陰陽之匡扶唯冀明神永
安締構稟玄化而垂恩福鎮土疆而庥護軍民保四
時風雨順調國永絕天灾地沴常歡洽阜

時康輓乎煥乎美哉盛矣今則功用既就良願已酬用
勒貞珉聊書撫實所貴後來賢彦知士精敬神明不假
繁文粗記年月時國六年重光單閼為相之月二十
有三日記○按一統志云防風氏廟唐元和中建錢鏐
致禱有應封顯德王是歲封巨石山為壽星寶石山山
今從廟碑為靈德王

高六十三丈周一十三里

一云封落星石為壽星石石大數十圍塊然無根望之如

斷歐陽史又云封落星石為寶石山○武林
梵志云巨石山又名石甌山羅隱有封山記浚中興寺

戒壇院井

井九十九眼
號錢王井

是時王改衢州龍丘縣曰龍游

惡丘為墓不祥也又改湏江縣曰江山

長興三年春正月唐升楚州為順化軍以王子明州刺

史傳珣領節度使

楚州時屬楊氏傳珣蓋鎮明州而遙領楚州節耳

二月唐遣

吏部侍郎盧詹刑部郎中楊薰賜王國信湯藥等三月

己酉夜大雪王寢疾謂將吏曰吾疾必不起諸兒愚懦

不足任後事吾死公等自擇之衆將泣下皆曰兩鎮令

公仁孝有功孰不愛戴王乃悉出印綸授子傳瓘曰諸

將許爾矣又曰子孫善事中國勿以易姓廢事大之禮

庚戌薨年八十一在位四十一年唐主聞赴廢朝七日

詔曰天下兵馬大元帥尚書令吳越國王錢闕本朝元

老當代勲賢位已極于人臣名素高于簡冊贈典既無

其官爵易名宜示其優崇即令所司定謚曰武肅一作忠烈

非仍以王禮葬詔工部侍郎楊凝式為碑文五代史補曰李瀚有

逸才每作文則筆不停輟而性嗜酒楊凝式常受詔撰錢鏐碑自以作不逮瀚於是多市美酒召瀚飲俟其酣

且使代筆經宿而成凡一萬五千夏四月庚午奉靈輜字莫不詞理典瞻疑式嘆服久之

殯於衣錦軍應順元年春正月壬午葬安國縣衣錦鄉

茅山之原是年建廟于東府

按備史載唐勅建廟在清泰三年蓋先立廟而後奏

允越二年奉真像入廟

皮光業吳越國武肅王廟碑文曰粵以唐長興三載壬辰春季

莫洞十三英天下兵馬都元帥尚父守尚書令吳越國王弃捐宮館以是歲明宗皇帝降太常博士段顯定謚議曰武肅尚書工部侍郎楊凝式撰神道碑文宣翰林待詔張季恭至吳越書於刊石後二年歲在敦牂天下兵馬元帥嗣吳越王建廟貌於始封之越國禮與境內樂之罔極孝思也蓋聞神道設教莫大於郊社嚴禋明德惟馨無逾於祖考孝享是以百代相襲六籍咸稱報効勞則天保是徵展欽若則王假是訓况建除難靜亂之業揚武烈之威名振剛德尅就之風成肅恭之懿號陳力四紀光奉八朝生為有土之君薨為衆朝之廟足可睢盱召畢鯁鯁桓文聲華永而日月齊簡冊編而今古在矧夫堂成王構家繼國肥璧寶以知來出玉林

而嗣位高陽號里無媿前賢夏屋登山常遵治命爰自
鄭緇始襲晉墨未除不忍一日之離遂立千年之祀金
銘陽邁已成像於吳城香刻旃檀復祔神於越國恭惟
先天下兵馬都元帥吳越國武肅王殷朝錢祖仙萼分
枝唐代鄴公靈源直派簪裾軒冕禮樂詩書疊慶連華
文光翊葉應劭七世累爵重官羅企一門惟忠及孝其
降神也虹飛蜀國始見殊祥魚躍汾河是生奇表赤光
耀室黃氣浮空石龜殞下於官山關人來歸於寶器其
英姿也鳳文龍藻典出精神白琥蒼珪琢為標格加之
薛璘整峻謝安風華俯仰可觀進退有度慕容德偃日
月角光影鏢人李子賢匿威儀龜文鎮俗其辭韻也
音容灑落智辯鏗鉤元善抑揚張暢詳雅至若討論國
計談畫兵籌接對使乎撫御將下所謂五湖奔注百谷
奔騰玉虹起而雲霧鎖金虎嘯而風飈動揣摩勝負赫
連勃口援懷慙押闔興亡蘇季子舌端有愧其氣度也
志高建木量等大瀛含垢匿瑕罔知邊際求賢接士無

忘寅昏重仁義若丘山視玉帛如咳唾翹翹車乘惟在
得人懂懂往來皆鍾和氣所以羔皮豹舄鷩列犀渠咸
顯殺身用酬大惠愛家為國誠由萬化生身以德聚民
所謂八風從律其英雄也能知否泰善俟雲雷動必有
成舉無遺策蛟龍得雨莫測變通鵬鷖出林可知意度
其間文武迭用仁義不常平阿亡戟得矛並能取舍元
鷗若蛇騎虎不覺艱難奄有具區廓開霸業設使庾翼
復出必不妄譽以桓溫阮藉重主安敢輕言於廣武其
文學也家承儒範世尚素風侍絳紗帳於先生授白綸
巾於神女才通夢寐鳳吐是來志在典經龍闕不顧所
以博覽七緯精究三玄盡得津涯皆昇堂奧其於篇詠
尤著功夫思風起而縞段闕言泉洶而金沙見其札翰
也花隨腕下星逐毫飛靄若游雲細疑垂露鈎刀向背
未繞索肉芝筋點畫方圓高掩崔肥趙瘦就中濡染脾
韻益見呈露鋒鉞四方仰之神蹤一代稱之墨寶王逸
少若見甘避鴈行蕭子雲如逢大慙蟬翼其建大功也

唐季乾符之末中和之初海鳧乍揚天龍初伏塵飛野
馬四郊之壘漸多露暗騰蛇五賊之機共構其始者王
仙芝結蒙中土首構禍階雖已誅爾猶殘支黨自此蒙
祠烏合草澤蜂飛儼薄者因是披攘謹厚者亦為慄悍
江南則朱直叛亂於唐山孫端寇娶於安吉西侵宛水
東患苕溪郡縣則終日登陴生民則長時伏莽王時邛
居葛國嘉適茅山方當枕石漱泉尚是衰衣博帶覩茲
多事慨然究懷顧謂朋友曰丈夫尚須撥亂平奸豈可
懷安端坐是日乃奮戎服挂波儒冠大散家財廣招勇
士申令纔舉行伍肅然手仗義旗身當勅敵一月之內
二寇殄平靜千里之山川救兩郡之冰炭是王之初立
功也其次黃巢來從五嶺直下三衢晨梟翅則雲布星
離張鯨牙則山連岳峙所遭蹂踐並作塵灰王乃獨領
偏師據於險地既達大憝遂設奇兵敵望草木叢林皆
是千矛旌幟我則左右翼陣點化如神當下追奔尚賔
餘勇長蛇封豕使出他疆新市下江保安數邑是王之

功也其次彭城漢宏據南鎮之重地守東越之名區黃
巢既犯兩京僖皇乃巡二蜀漢宏不思奔問便廢貢輸
恃險阻於浙河欲覲覲於浙岸先於漁浦龜石翼張下
營蕭山西陵鱗次列砦鏈燧交應輦鼓相聞時我諸軍
實有難色王乃潛趨間道夜濟長江仰告昊天乞昏明
月當下寒雲布野殺氣凝空楚廟陰兵旁隨霧合晉臣
黑慢闇與山連我師忽震於雷霆彼砦俄驚於魂夢風
號龍虎爭傳破竹之聲陣卷龍蛇薙集建瓴之勢賊將
殷輪不暇漂杵有餘僅身免以奔歸乃塞門而自守通
後大小百戰首尾四年方清鏡水之波始有蘭亭之地
予其生聚大布仁慈誅彼渠魁不煩天討是王之功也
次則有薛朗逐出周寶自據朱方南襲毘陵西侵建業
恣其剽掠務在殺傷將乘中國之危擬扼長江之險王
乃命二麾將期一月報功指其山川授以韜畧蹄數並
舉水陸兼行曾不旬時計平虛穴曩南宮萬於犀革視
以囚人梟崔慧景於黜藍彰其叛主是王之功也次則

有徐約比是六合鎮使遠忝三吳邵符王帛是求徵斂
無度長時習戰齊民因被雕黥比屋為軍魯儒亦遭翦
削惟王聞其暴虐奮激神威發上谷之精兵命下江之
賢將授以九天九地之訣傳以訓辭訓典之規扼斷咽
喉清其郊野任約之龍果睡王彌之豹徒飛食君朝餞
無由撫士計窮宵遁遂至潰圍松陵之烟水重清香徑
之黎元再活是王之功也次則有孫儒侍有數萬兵甲
不守淮南直欲別遣土疆遂奔江左剗人民為糧食暴
舍宇為薪蘇餓鵲饑鴛飛揚京口貪狼乳虎踐踏吳門
新逼由拳將窺害水王乃張天網於險阻闢地牢於要
衝發水犀之驍騎設燧象之機謀青雀摩壘赤兔致師
將持久以待之俟勢窮而必取守埤皆哭無食何為鳴
鼓而攻脫身遂去向使不施神畧不振王威則翼翼最
靈皆成膏血茫茫勝槩盡作烟煤所謂劬勞為時廣大
及物是王之功也次則有董庶人始鎮石鏡便牧杭州
因破漢宏遠居越土自形成象從纖至洪並是王之環

甲執兵左提右挈以至手持旄節身爵王侯既滅頂於
彘倫乃垂涎於神器銅符金匱祥瑞亂興玉璽珠袍妖
訛競起王以早同楚敵夙共晉盟書尚緘滕血猶濡鋌
戕玉旁干誘勸交馳諫既閉於屬垣禍遂成於覆族是
時兩河倔強三輔紛紜萬衆雖拱於北辰一人不違於
南顧王請奉行天罰所統便是國兵不費上供資財不
役諸道將帥果見桓元計窘抽玉導以求生王莽勢窮
轉銅威而厭勝喉既春於富父骨復專於會稽稽其故
宮焚其法物復我正朔清我衷瀛五石補而天鏡明六
合完而地維正是王之功也王以平妖立霸時之業戲
難建蓋世之功律呂宮商鏘洋史藉丹青金玉與爛國
華所以僖宗天子仰我文昭瞻我武烈龍光壓壘急使
星馳紛紜便蕃大王風起尋以耿純試理盧植兼才披
錦衣以耀家鄉握珪苻而光松梓洎於昭皇飛昇大寶
禮遇元勳龍悅白雲鳧忻得藻嘉功賞德金鳳之詔連
飛表異旌優玉麟之符遂刻移南徐之藩翰就錢塘之

江山節竦靈犀帳開神虎三千珠甲光爛星辰十二牙
旗文生組繡碧幢繞連黃閣又開乃兼鎮於越藩遂對
持於漢節中天辰像雖分牛斗之疆夾岸烟嵐映出東
西之宅四縣既食萬戶累加榮戟立門赤油羅列山河
誓券金字焚煌生祠之遷豆鏘鏘衣錦之城隍黯黯而
又特逾漢制封我吳王茅分夏社之心桐翦周王之手
昔也龍蛇起陸踏湯火以戰爭此際山川出雲見君臣
之際會速夫濟陰王既傳天寶梁太祖遂應玄苞於王
不易范張之故情請結秦晉之嘉好恨無殊禮得展異
恩於是追呂望之高風擬山甫之美躅師尚父統攝三
老作帝股肱尚書令總務萬機為天喉舌仍頒瑞節復
陟齋壇建牙兼鎮於揚州分閫遙臨於楚甸尋命兵部
尚書姚洎躬持鳳冊遠泛鯨波備周官之典儀封越國
之土宇八鷹四馬耀鏤錫以振鈞膺三節一王秉桓圭
而垂玄玉及龍德嗣君即位禮稱伯舅尊曰父師寅敬
列光益虔顧命是遣吏部李尚書燕奉持綸告繚遠湖

湘授天下兵馬都元帥洞庭彭蠡漸無不順之臣北闕
西國將有後予之歎昔韓信對漢高祖曰陛下能將將

臣能將兵是知元帥非人臣之職曹益帝王之兵柄推
於前代隋煬帝自晉王淮南行臺尚書令祇為行軍元
帥天下之號國朝肅宗皇帝駐蹕靈武曰命代宗皇帝
自廣平王而為之德宗皇帝自魯王而為之梁太祖授
九錫後而為之斯天下元帥之故實也其後龍德帝復
命兵部崔侍郎協齊持簡冊浮汎風帆揚旌典於明庭
促及時而建國奉召康公之命得以專征授唐叔虞之
封良由吉夢未久金行運息土德中興莊宗皇帝鵠起
并汾龍飛宋汴當宁不逾於旬朔臨軒宣諭於公卿曰
吳越國王五十年來常作播天之柱三千里外每為捧
日之雲今若將致小康實在敬尊元老於是鸞臺進擬
麟趾摛詞典瑞獻功琢白圭而冊文燦爛職金供命鎔
紫磨而印篆盤珊重封吳越國王再授天下元帥馬遷
十代史內國是絕倫柳晉萬卷書中必無佳例其建國

也大君有命明試以功自癸未而至壬辰備戰器而脩王道先是中朝名士在野遺人或負笈擔簦來投霸府或折襦為袴而詣軍門奮袖於嘉納堂中曳履於靈鈞臺上至此水鏡裁鑒金枰等量並列庭臣皆居省署簪裾列侍文物齊光張伯仁陳宗廟之儀鄭子產獻公侯之禮豈謂難窮者大數莫究者彼蒼俄脫履于具區遽徹縣于正寢金山霧掩誰知帝召王喬玉海波空實痛神辭李廣况十三州疆場百萬戶黔黎咸長養於恩膏悉生成於儀澤淚洒而晴空散雨愁凝而杲日沈雲鳥獸悲哀草木悵沮明宗皇帝宣太常而定謚法詔貳卿而撰誄文鷹輅龍旂贈禮優於鄧禹梓宮黃屋異數等於霍光得謂盡始盡終極榮極貴享九九之仙壽近帝位於一父感萬萬之人心歆神道於千祀有後如此又何缺焉我天下兵馬元帥吳越王富燕族之多奇承趙宗之後世嵩嶽泰華秀氣俱騰淮濟江河榮光並結是時肖主誕我國祥紹經文緯武之基襲積德累仁之業

開襟奪臆伏雄傑於周瑜誓衆臨戎統人豪於張袞風
儀則懸星溢紫電揚鹽霜雪凝肌魚龍入髮仙應有
分貴不可知宋弁聳姿尤閑進對賈融詞氣惟是早恭
加以青雲常在言談畏日不離於顧盼徐行緩步褚
彥回却是趨踰散憤斜晉王文憲珠非蘊藉智畧則鮑
叔雖天應手而來顧和珪璋遇機方露遠者大者一剛
一柔靜則心照鏡而貌懷冰含和六氣動則火炎山而
湯湧海惴懼萬人機變則管葛才高孫吳術妙身文虎
豹隱見不常義府戈矛短長迭用三鳥才既為已任六
奇策固是無遺卻敕詩書經綸國計項羽雷電振動兵
籌涂睇而莫測金泉旁窺而罔知珠岸詞藻則青霜皓
月絳綵綵芳草落花飄颻縷管織成夢錦散出神霞
英爽屢奇張融之言信矣凌顏黼黻謝元業之論宜然札
翰則早受義方曾傳掣筆驚回鵠反氣勢驚人金錯銀
鈎縱橫八末案牘無非墨陣宮室爭耀寶碑崔宏之本
草無尤張育之折蒲失色立功則我王初離太學始統

親兵鄭世子方欲平齊汝陽王正思安漢屬隣國侵軼
命將曰李濤僅二萬兵下百里若圍逼安國涎啄餘杭
我王虔奉訓辭遂昇上將清風受式黃石傳書親蒙韓
夷之黃羅躬伏封文之白虎攻東南而備西北事在機
先掩五壘而出三門別馳神算于是崩摧大陣擒獲萬
人道路隘於俘囚山川積於戈甲餘敵作氣既竭方遁
於潛我則乘勝追奔又平廣德未出一百里之境復降
五千來人唱凱歌而喜氣連郊整班師而雄風掠地尋
即大統龍艦遠泛鯨溟巡江陰而收東州入海門而觀
北固彼境遂陳舟楫遠出枝梧我則陳二廣於浪港沙
前設三覆於石牌灣內零陵石灰風便爭投於蛟蜃窟
中沁水火抵油燃倭焚於鯨鯢腹裏一戰定霸二紀無
虞寒海具瞻將相迭耀聲光平顯裴松為廊廟之人功
業升聞段襄居骨鯁之任爰自嗣承國構續奉王基況
當踞前之初又在寢苫之內芝蘭龍鳳二千餘口之家
風鐵石虎貔二十萬人之軍府誠難撫御豈易輯綏我

王以孝為模用仁作範無所不可惟言是從嘉惠寵靈
供承花萼油雲膏雨潤澤閭門此外習武益兵輕刑慎
罰德無脛而遠屆名無翼而遐飛衆動大朝繼踵異寵
三年之內兩冊連封雙龍之金節齊行四馬之寶車並
輟玉具冠劍見王者之尊崇織文旂常觀國容之貴盛
我王因茲顯赫益動孝思無以答先后之恩無以報昊
天之德且曰武肅王有大功及天下大名振寰中庇生
民則百萬有餘築城壘僅五十來處豈可不建廟貌不
像真容為星紀之福宮作地戶之神主爰命與武忠直
都虞候姚敬思於馬臻湖畔勾踐城中選闢閭形勢之
中區得顯敞高平之勝址於是鍛杵俱下畚鍤齊興隱
隱雷聲轟轟岳振不十旬而展役布千丈之隆基大梓
文枿非是秦山伐木宏梁巨棟非因漳水漂來雕鐫者
王母玄圖梵砌者赫連繡石斤揮斧運削出銀葩水鑿
沙磨方成玉碣符玄武之嘉兆應神著之吉辰始乃架
陰梯虛雲構山屹陰虬迴抱陽馬奔趨虎牙銜而析拱

連龍脊裏而樂壇轉瓊瑤耀壁丹漆明簷鴛鴦之瓦縫
界成芙蓉之塼文印出即以丙申歲秋八月十有七日
我王傳鹵簿鼓吹車輅旂常北司侍臣南班舊列奉迎
真像而入祠宮白檀雕出聖容黃金鏤成寶座儀形酷
類神彩如生鳳目龍章顏猶不破垂旒被袞人見興悲
禮器則俎豆犧安軒懸則祝故鍾磬后殿罩衣雄服文
母賢妃露幔珠屏岷蘆象榻不異昔時祕寢皆同曩日
深宮前則廣廈交陰芳亭對構紫石伏狻猊之影朱欄
交菡萏之光正啓重門並立神將侍衛兵仗矛戟森然
文武官班蕃裾肅列直出甬道千步有餘河枕投醪波
通射的蓮芰遶於紅閣桐桂夾於星橋左則迴抱粉廊
連延綺棟並圖曹署各列司存乃至早世勳臣無祿公
子皆塑儀像並配薦羞右則修廡飛臺綠窓丹牖陰兵
神馬見雷電而沒風雲明宰淨廚構築盛而烹肥腩景
物則高山矮挂粉竹金松夾砌名花連階瑞草烟嵐蔚
蔚便是陰宮雲霧濛朧居然神府我王昔以致君之業

累殄寇戎今立顯考之祠而修孝敬所以天朝繼封王
爵以耀國章金印綢宇內徵呼元帥帥天下侯伯卓絕
殊勛洪業所謂炙地薰天設使書剡州九萬之牋不能
盡紀勒華山五千之仞亦恐難窮光業也詞不容於王
掾才匪量於曹斗擬奚斯之頌或恣羸心對豫章之碑
豈合借手但以二紀幕客十載廷臣不求孫綽擅名豈
望揚脩絕妙所希編述用答恩知追感先王恭為銘曰
崧高嶠岫是生哲人上天獅子出澤麒麟錢萼殷祖鄴
庠唐臣衣冠表裏文武經綸廣運將新大盜斯起雁象
欺驚鳧毛亂委紫蓋蒙塵黃金多壘既戮憲章又裂文
軌武肅英王提劍東方龍行雲雨虎變文章字氣沃洒
妖雪歸湯洗滌星紀整頓天常告功狼居圖形麟閣相
珪聯編茅土續索三道犀幢八朝鳳幄丹卷家門錦衣
城郭元帥天下國王具區六瑞琢冊三品鐫符尚父四
履尚書萬樞峴岷峨高壽暎赫霸圖我王奉天為時而出
傳寶應金繼輝趙日國土無雙風華第一削樹平戎夢

未受秩功既挺世德又動天襲封二冊嗣位三年金應
國寶元帥兵權忠無瑕類孝絕雕鐫未梳墨線乃建清
廟臥龍之城會稽之嶠嵐界迴廊粉明周繚廣殿霞開
重門兵峭瑞玉禮器香檀聖容民之祀主我之神宗秉
翟執齋特磬編鐘然蕭炳脾真帶翰琮於穆祠中煥然
陰府五齊恒馨六佾常舞隨薦房蒸歌隨路鼓令子懿
孫光今
顯古 王厯事四朝累加定亂安國啓聖昌運同德守

道翊戴功臣天下兵馬都元帥開府儀同三司尚父尚
書令兼中書令上柱國吳越國王賜劍履上殿詔書不
名凡功臣諸子領節制皆署而後請命王居處務期節
儉衣衾雜用細布常膳惟蔬漆器寢帳敝恭穆夫人欲

易以青繒不許

十國紀年云鏐居室服御窮極侈靡末年荒恣尤甚似未確

常歲除

夜會子孫鼓琴未數曲遽止之曰聞者以我為長夜之
飲少在軍中夜未常寐倦極則就圓木小枕或枕大鈴
寐輒歌而寤名曰警枕置粉盤於臥內有所記則書盤
中又時彈銅丸於樓牆之外以警直更者一夕微行叩
北城門吏不肯啓闕曰大王來亦不可啓明日召吏厚
賜之稍暇則命諸子孫諷誦詩賦或以所製詩賜丞相
將吏亦間能書寫畫墨竹然不以咕嗶廢正務或有述

李頻詩于王曰只將五字句用破一生心王曰此心何
所不用而破于詩句惜哉反復議論由是徃徃達旦天
福中近侍李詠因監契丹驛中有判官謂詠曰武肅王
常夜不睡詠詰其所知答曰嘗聞五臺王子太師言浙
中不睡龍今已歸矣訪其所聞乃壬辰之後也

僧贊寧傳載畧

云武肅王常時詣諸院孫敏利者老姥監直聽更一宵
銀枝燈有大蜥蜴沿油缸而吸視之將竭倏然不見明
日王曰昨夜夢麻膏充腸而飽是何祥也宮中或有對者王亦微哂而已又幼時儻有大

度志氣雄傑機謀深遠每處衆中而神采有餘居家庭

極盡人子禮純孝本于天性開國後遇春秋薦享必鳴咽流涕曰今日貴盛由積善所致但恨祖母不能見耳是時中原多事西川王氏稱蜀廣陵楊氏稱吳南海劉氏稱漢長溪王氏稱閩皆竊大號或通姻戚或達聘好咸以龍衣玉冊勸王自帝王笑曰此兒輩自坐爐炭之中又踞吾于上邪却之不納而諸國主亦無不以父兄事之王負知人之鑒尊賢下士惟日不足名其居曰握髮殿取周公吐哺握髮之意

後人謬為
急發殿

常使畫工數十

人居淞江號鷹手校尉伺北方流移來者咸寫貌以聞
擇清俊福厚者用之胡岳方渡江時畫工以貌奏王觀
而歎曰面有銀光奇士也即時召見幕客羅隱雅好譏
評雖及王微時事怡然不怒人咸稱其寬大後庭有鄭
姬者父坐法當死左右冀其獲宥且言斯人有息女預
侍王曰豈可以一婦人亂我法出其女而斬之其公正
不私又多此類也

論曰歐陽氏五代史謂錢氏有改元而無稱帝之事然

獨得其封落星石制書稱寶正六年辛卯一節耳及宋
末于臨安府得吳越尊勝幢有云天寶四年歲次辛未
是朱梁篡唐之明年戊辰已改元天寶矣又靈隱尊勝
幢云寶大二年歲次乙酉婺州觀音院鐘刻云寶大二
年乙酉而朱府君墓誌亦言寶大元年歲次甲申是唐
之同光二年在吳越為寶大元年也元至正時海寧州
發吳越臣許俊墓內署寶正三年于石而招賢寺幢及
貢院橋柱皆題寶正年月不一而足則武肅王之改元

斷矣獨是越州城隍廟碑既奉梁勅為梁主父名諱且
上書開平二年歲在戊辰又杭州真聖觀碑後署開平
二年八月豈立碑在改元之月之前抑武肅王於中原
正朔或遵或廢陽用而陰違邪至于台州壁記有錢鑑
天祐十九年之紀而瑪瑙水月寺幢復有言作寶貞年
號者載籍傳譌卒不可得而明也

間自若唐末沈聞錄又作保正亦誤

姑

舉其大端以為吳越改元之證云

或言羅隱新城縣記署寶大元年于癸未

歲與諸石刻小異以此為疑任臣素新城已改新豈何得復云新城即曰梁亡之後不為梁主父諱或仍舊稱

未可知然隱卒于天寶三年安得癸
未年尚撰縣記乎此必偽作明矣



十國春秋卷七十八



總校官庶吉士臣張能照

校對官檢討臣王鍾健

膳錄貢生臣李敬敏